

ZEMZEM

LIST UČENIKA GAZI HUSREV-BEGOVE MEDRESE U SARAJEVU
GODINA LI - NOVEMBAR 2020./REBIUL-EVVEL 1442.
BROJ 209 - CIJENA 2 KM, ZA INOSTRANSTVO 2 €



**POSJETA REISU-L-ULEME
MEDRESI**

**MEVLUD U NAŠOJ
TRADICIJI**

**AMFITEATAR DOBIO
NOVI IZGLEĐ**

**NASTAVA U NOVOJ
ŠKOLSKOJ GODINI**

**DOŠLO JE DO NAS
YA RESULLAH**

SADRŽAJ:

“Nazvali smo ga “Zemzem”, žečeći pri tome da kroz njega napajamo one koji su željni istine potečle iz Kur’ana i Hadisa, koji su željni dobrog vaza i lijepo zabave kroz pjesmu i priču kao što žedni želi ugasići žeđ blagotvornim djelovanjem bistre vode sa vrela Zemzem.”

Zemzem broj 1, godina 1968.



- | | |
|--|--|
| <p>02 RIJEČ UREDNIKA
ABDULAH KADIĆ</p> <p>03 PISMO PRVAČIĆIMA
RUMEJSA MUJIĆ</p> <p>04 DOŠLO JE DO NAS...
HFZ. ADNAN SALIHAGIĆ</p> <p>05 ŠEFA'AT
EMIRA KAHRIĆ</p> <p>07 PJESMA
ELMIR BAJRAKTAREVIĆ</p> <p>08 MEDRESA FLASH
BERINA MUSIĆ</p> <p>11 BIJEG
FATIMA HUSEJNSPAHIĆ</p> <p>12 SREBRENICA
DINA PEPIĆ</p> <p>13 SLOBODNO VRIJEME
ZILKA TOPOLJAK</p> <p>14 MEVLUD U NAŠOJ TRADICIJI
AMINA KUSUR</p> <p>16 SKRUŠENOST U NAMAZU
ELDAR ŠABIĆ</p> <p>18 POKLONJENI KUR'ANI
NA BRAILLEVOM PISMU
JUSUF BUKVA</p> | <p>19 POSJETA REISU-L-ULEME MEDRESI
ARMIN ARNAUTOVIĆ</p> <p>20 VIJESTI IZ SVIJETA
ARMIN ARNAUTOVIĆ</p> <p>22 PRETJERIVANJE U JELU
EMIRA KAHRIĆ</p> <p>24 SELAM, YA RESULALLAH
ESMA HADŽIĆ & LAMIJA BASARIĆ</p> <p>28 PREDSTAVLJANJE PRVAČIĆA</p> <p>36 AMFITEATAR DOBIO NOVI IZGLEĐ
BERINA MUSIĆ</p> <p>38 NOVA ONLINE ŠKOLSKA GODINA
AMINA SUBAŠIĆ</p> <p>40 ŠALJIVI KUTAK
DŽEJLA MUHIBIĆ</p> <p>41 U VJERI NEMA PRISILE
ILMA ČANDIĆ</p> <p>42 AMBASADORI ISLAMA
ABDULAH KADIĆ</p> <p>44 ČUVARI BOŽIJE KNJIGE
EMIRA KAHRIĆ</p> <p>48 ISPUNJALJKA
ANISA BAJRAMOVIĆ</p> |
|--|--|



Pokretač i izdavač
Udruženje učenika Medrese
“Gazi Husrev-beg”

Glavni i odgovorni urednik
Abdulah Kadić

Zamjenica gl. i odgovornog urednika
Lamija Basarić

Tehničko uređenje & DTP
Hamza Selimović

Redakcija
Ismail Alibegović, Armin Arnautović,
Elmir Bajraktarević, Anisa
Bajramović, Jusuf Bukva, Dalila
Čovrk, Halima Delibašić, Esma
Hadžić, Fatima Huseinspahić,
Halima Išerić, Emira Kahrić, Merjem
Krlić, Nejra Kukuljac, Amina Kusur,
Ubejda Mujezinović, Rumejsa Mujić,
Berina Musić, Dina Pepić, Edina
Spahić, Amina Subašić, Azra
Tabaković, Zilka Topoljak, Sabrina
Vehab, Medina Zubčić, Emela
Zukorlić, Ilma Čandić, Eldar Šabić

Lektori
Azra Tabaković, Ilma Čandić, Berina
Musić
Adresa: Redakcija lista “Zemzem”,
Sarači 49, 71000 Sarajevo
Telefon: +387 33 534 888; +387 62 665
254; +387 61 043 087
Web: www.medresa.ba
E-mail: zemzem@medresa.ba

Tiraž
1200
Štampa
Dobra knjiga,
Sarajevo



RIJEČ UREDNIKA

Sva hvala i zahvala pripadaju Al-lahu dž.š., Gospodaru svih svjetova. Neka je salavat i selam na posljednjeg Božijeg Poslanika, Muhammeda, a.s., na njegovu časnu porodicu, plemenite ashabe, kao i sve vjernike do Sudnjeg dana.

Svjedoci smo, slobodno mogu reći, posebne situacije, kako u svijetu, tako i kod nas. Pandemija koronavirusa je, u manjoj ili većoj mjeri promjenila skoro pa sve sfere našeg života. Pored ostalih mjera koje je bilo neophodno poduzeti, bilo je nužno i u vrlo kratkom vremenskom periodu organizirati nastavu u novonastalim okolnostima, u kojima se i dalje nalazimo. Medresa je na ovu situaciju odgovorila jako brzo te s ponosom možemo reći da je Gazi Husrev-begova medresa uspjela zadržati kontinuitet rada zavaljujući odgovornim profesorima, odgajateljima, ali i učenicima.

Iako je način stjecanja znanja za učenike u dobroj mjeri izmijenjen, to nikako ne znači da se vrijednost traganja za znanjem smanjila. Podsetimo se, prvi ajeti koji su objavljeni Muhammedu, a.s., jesu prvih pet ajeta sure „El-Alek“, u kojima Allah, dž.š., veli: „Čitaj (uči, studiraj, edukuj se, istražuj, opameti se) u ime Gospodara tvog...“ (El-Alek, 1). Božanska naredba «Čitaj» ne odnosi se samo na Muhammeda, a.s., već na čitav muslimanski ummet, pa i u ovakvim okolnostima. Dužnost je, kako nama učenicima, tako i svim muslimanima i muslimankama širom svijeta, prilagoditi se situaciji, te nastaviti truditi se, koristiti vrijeme produktivno, nastojati svaki dan pročitati, naučiti nešto novo, kako o islamu, tako i o ostalim znanostima, sve s ciljem st-

jecanja Allahovog dž.š. zadovoljstva. Ne dozvolimo da nas obuzme letargija, već nastojmo iz ove situacije izaći bolji nego što smo bili.

Imajmo na umu Miljenikove a.s. riječi: “Vrijednost učenjaka u odnosu nad po-božnjakom (onoga koji obožava Allaha, čineći mu ibadet) je kao mjesec u odnosu na druge planete. Zaista su učeni nasljednici poslanika, a poslanici nisu ostavili u nasljedstvo ni dinara ni dirhema, ali su u nasljedstvo ostavili znanje. Ko je preuzeo to (nasleđe) od njih, preuzeo je veliku blagodat.” (Ebu Davud, Tirmizi).

Molim Allaha dž.š. da nam podari snage da prevaziđemo i ovu, svojevrsnu prepreku u našim životima, te da nam olakša stjecanje znanja.

Želim podsjetiti da je glavni i odgovorni urednik zajedno sa novom redakcijom Zemzema u potpunosti otvoren za bilo kakva pitanja, sugestije, kritike ali i pohvale, koje možete poslati na mail: urednikzemzem@medresasa.edu.ba.

Abdulah K.



Pismo prvačićima

Dolaskom u Medresu prvi dan, susrećemo se sa nepoznatim licima, primjećujemo djevojke koje se grle i momke koji se sa mnogo sreće na licima selame, Mi, djevojke, nosimo kofere na taj čuveni četvrti sprat rezervisan samo za nas, fazanke. Zidovi Medrese u tom trenutku čine se najhladnjim na svijetu, dolazimo i upoznajemo se sa prostorom koji ćemo dijeliti sa još mnogo osoba. Porodica odlazi, a mi, fazani i fazanke, ostajemo sami. Malena bića među zidinama koje su u surov život izbacile ljudske veličine. Ubrzo, primjećujem panoe generacija maturantica koje su kročile istim hodnicima i krasile ih svojim prisustvom. Ti se hodnici više ne čine tako hladnim; smijeh, sreća i ljubav otjeraše hladnoću. Medresa postaje drugi dom, mirna luka, nešto čemu se rado vraćamo od svoje kuće i od čega se teško rastajemo. Naš život je kao pisanje knjige. Ima početak i kraj. Između početka i kraja su poglavla kojim hodimo sve dok nas top života ne izbací do kraja naše životne staze. Dolaskom u Medresu, dragi naši,

započeli ste novo poglavje vašeg života koje će trajati četiri godine. Medresa je putovanje, škola koja dočekuje učenike nadarene, posebna ustanova gdje krojite vaše priče o ljubavi, mladosti i prijateljstvima. U njoj upoznajete prijatelje sa kojima dijelite suze, radosti, školske brije, ljubavne tajne.. Sve to, uspomene su koje će stanovati duboko urezane u vašim srcima. Naši profesori bruse dijamante i čeliče nas da sutra svako od nas bude dobar, odgojen i obrazovan insan, te jačaju naša krila kojima ćemo poletjeti u priču zvanu život. Medresa će vas ogrnuti plaštom znanja, bogobojaznosti, istinskih vrijednosti, ljepotom srca i duše. Ona će oblikovati vaše ličnosti, svjedočit će tome kako dječaci i djevojčice postaju odrasli momci i djevojke, krasit će vas titulom gazija i gazijski koju ponosno do kraja života nosimo. Sada se završava priča o našem boravku u Medresi, mojim prijateljima i meni je nestalo tinte. Vrijeme je da uzmem natrag naše kofere punе novih iskustava, a vama ostavljamo emanet da pišete knjigu



Došlo je do nas, ya Resulallah

Ya Resulallah, još jedna godina prođe i još jedan rebiu-l-evvel dođe. Doneće nam sa sobom neki poseban hal, ali pobudi, ya Resulallah, pobudi za tobom čežnju i žal.

Pobudi čežnju za najboljim insanom, preko kojeg Uzvišeni Allah počasti ovaj ummet Kur'anom i kog posla sa misijom tako teškom i važnom. Pobudi čežnju za onim kojeg je Plemeniti Gospodar poslao kao milost svim svjetovima, u kojem nam divan uzor dade, čiji ahlak je veličanstven, a čije slijedeњe je ključ Allahove ljubavi. Ya Resulallah, čeznemo za tobom, a znamo da si i ti čeznuo za nama – došlo je do nas. Znamo za onda kad si uzdahnuo, pa te ashabi upitaše: „Zašto uzdahnu, Allahov Poslanče?”, a ti im odgovori: „Poželio sam da smo vidjeli našu braću.” Pa te ponovo upitaše: „Zar mi nismo tvoja braća, ya Resulallah?”, a ti im tad reče: „Ne! Moja braća su oni koji će doći iza mene.” (Ahmed) Nikad nisi slagao pa ni tad kad si dodao: „Jedan od njih bi me volio vidjeti više nego što voli porodicu svoju i imetak svoj” (Muslim) Tako je, ya Resulallah, tako je!

Došao je do nas, o Allahov Miljeniče, i hadis u kojem si rekao: „Svaki Poslanik je imao primljenu dovu na ovom svijetu, a ja želim svoju dovu odgoditi kao šefaat za svoj ummet na Sudnjem danu.” (Buhari)

Došlo je do nas, o Allahov Poslanče, da si jedne prilike proučio ajet u kojem se Ibrahim, a.s., obraća Uzvišenom Allahu i žali na kumire koje su obožavali mnogi ljudi iz njegovog ummeta: „Oni su, Gospodaru moj, mnoge ljude na stranputicu naveli...” (14:36). Potom si proučio ajet u kojem se Isa, a.s., obraća

Uzvišenom Allahu i govori za svoje sljedbenike: „Ako ih kazniš, robovi su Tvoji, a ako im oprostiš, Silan i Mudar Ti si.” (5:108) Digao si tad ruke našem Gospodaru i zavatio: „Gospodaru, moj ummet, moj ummet!” Došlo je do nas, ya Resulallah, zaplakao si tad. Zaplakao si, ya Resulallah, pa ti je Uzvišeni Allah poslao meleka Džibrila sa radosnom viješću da će te u pogledu tvog ummeta učiniti zadovoljnim, a ne žalosnim i nesretnim. (osnova: Muslim)

Toliko si brinuo o nama, a nismo bili ni rođeni. Toliko si brinuo o nama, a mnogi od nas su tako slabi, nemarni i strastima prepusteni. Ya Resulallah, divno i slikovito si opisao svoju brigu i strah da tvom umetu Vatra ne bude vječno prebivalište kad si kaže: „Primjer mene i vas je kao primjer čovjeka koji je naložio vatru, a onda su na njen plamen navalili leptirovi. Ja vas pokušavam uhvatiti za vrhove vaše odjeće da ne upadnete u vatru, ali mi vi izmičete.” (Buharija i Muslim)

Ya Resulallah, da budemo dio društva tvog, nakon Allahovog zadovoljstva najveća je želja srca mog. Uzvišenog Allaha molim da pomogne nas, tvoj ummet, da nikad s puta Istine kojem si nas pozivao ne skrenemo i da tvoju brigu nikad, nikad ne zaboravimo.

**Salavat i selam na tebe, naš prvače, naša vezovi
naš usmjeritelju, Muhammedu, Allahov Poslanče!**

Kada džennetlije uđu u Džennet a džennetlije u Džehennem i od tog trenutka prođe pedeset hiljada godina, Džibril a.s., će se obratiti svome Gospodaru i zamoliti:

„Bože moj, zaželio sam se ljepote Muhammedove a.s. pa mi dozvoli da ga zijaretim.“

„Već ti je dozvoljeno“, odgovorit će mu Allah dž.š.

Džibril će na to: „Bože moj, kako da mu odem praznih ruku, bez hedije?“

„Idi i sa sobom ponesi hediju koja mu je najdraža“, reći će Allah dž.š.

„A šta je to, o Gospodaru?“

„Grješnici njegova ummeta koji su ostali u vatri. Idi u vatru i traži ih, pa kada ih ugledaš otiđi Pejgamberu a.s. i reci: ‘O Muhammede, dolazim ti da te obradujem hedijom. Ako hoćeš, dat će ti je.’ Kada te on upita šta je to, ti mu reci da je to veliki grješnik od njegova umeta koji je sad u vatri, pa kada ga on pun čežnje poželi vidjeti, ti otiđi po njega i izvadi ga iz vatre.“

Tako će Džibril a.s., ući u Džehennem i vidjeti skupinu u paklenim mukama, sagorenju poput čumura, u okovima i sindžirima, a među njima jednog čovjeka bijelog lica, ruku i nogu, pa će ga izdvojiti i upitati o njegovom halu i čijeg je umetta. Pošto je on zaboravio ime Muhammeda a.s., ime ummeta, ime svoga oca i evlada, reći će: „Ja ne znam.“ Potom će pasti na sedždu u suzama i ljubeći stope Džibrilove a.s., zamoliti: „O Allahov robe, zauzmi se

za mene kod Allaha, jer azab više ne mogu podnosić.“

Džibril će reći: „Pošto se ne 7mena svoga Pejgambera, reci mi kako si ibadet Allahu dž.š, činio?“

Čovjek će se prisjetiti: „Svake godine smo postili trideset dana, a u svakom danu klanjali pet puta.“

Tada će Džibril a.s., otkriti: „Pa ti si od ummeta Muhammeda a.s.!“

Kada čovjek čuje ime Muhammed a.s., zavapit će: „O Muhammede, o Ahmede, o Pejgambere, o Zagovorniče, propao sam odvojen i udaljen od tebe!“

Džibril a.s., će ga naputiti: „Ne zaboravi ime svoga Pejgambera dok odem do njega i izvijestim ga o tom slučaju, kako bi se za tebe zauzeo.“

Pa će Džibril a.s., otići u Džennet i vidjeti Muhammeda a.s. sa svojom porodicom, ashabima i ummetom u džennetskim blagodatima. Džibril a.s., će ga poljubiti u ruku, a Pejgamber a.s. će reći: „O Džibrilu, kako to da si mi došao praznih ruku?“

Džibril a.s., će odgovoriti: „Naredba je Allaha Uzvišenog da ti ne dođem sa hedijom prije nego se sa tobom posavjetujem.“

„A šta je to?“, upitat će Resulullah a.s.

Džibril a.s., će nastaviti: „Radi se o čovjeku iz tvog umeta koji je u vatri.“



Kada to čuje Allahov Miljenik a.s., bacić će pehar iz ruke i tadž sa svoje glave pa će sa svojim ashabima izaći iz Dženneta i reći: „Neću ući u Džennet dok mi Džibril ne dođe sa tim čovjekom.“

I Džibril a.s., će otici u Džehennem i čovjeka tražiti u njegovim dubinama, ali ga neće naći. Zbunjen, u suzama će pasti na sedždu i obratiti se svome Gospodaru: „Bože moj, stid me je otici Muhammedu a.s. bez tog čovjeka. Gospodaru, zar ćeš me pred njim osramotiti?“

Allah dž.š. će mu reći: „O Džibrile, traži čovjeka u toj i toj dolini kod brda koje se zove Gajja. Sa strane tog brda je jama, mjesto onih koji su namaz ostavili. U njoj ga traži dok ga ne nađeš.“

Pa će Džibril a.s., otici do dna Džehennema i u toj jami ga naći kako doziva: „J Hannānu, jā Mennān.“ Kada god to izgovori vatra pobegne od njega. Džibril a.s., će mu reći: „Pođi sa mnom, o asijo, dok te ne izvedem iz vatre i odvedem u Džennet.“

Čovjek će mu odgovoriti: „Bilo mi je teško jer se nisam mogao sjetiti Allahova imena, ali sada sam ga se sjetio, pa nemam straha od vatre niti ona nada mnom ima moć.“

Džibril a.s., će ga pozvati: „Naš Sejjid, Muhammed a.s. te očekuje.“

„Ja čeznem za Muhammedom a.s., reći će čovjek, „ali me je stid pogledati ga crnog lica i lošeg hala.“

Džibril a.s., će ga izvesti iz vatre i sa njim krenuti put Dženneta. Cijelim putem čovjek će od stida plakati. Kad se približe Džennetu, Pejgamber a.s. će im poći u susret. Čovjek će ga poljubiti u ruku i zavapiti: „O Sejjide, o Resule, jesli li me zaboravio u vatri i ostavio da se tamo patim!“

Pejgamber a.s. će ga zagrliti i upitati za grijeh zbog koga je toliko vakta bio u azabu. On će odgovoriti: „O Muhammede a.s., stid me je pred tobom spomenuti svoj grijeh.“

Pa će ga Pejgamber a.s. zakleti da mu kaže i on će reći: „Namjerno sam propustio namaz.“

Bosna i Hercegovina jedna jedina

Ona je zemlja moga babe, djeda,
amidža i strina,
ona je jedina
moja domovina.

Bosna je amanet
što nam ostaviše pretci,
pravi simbol mira
poput žubora u rijeci.

Mnogi su ratove vodili
zbog nje, naše Bosne
svi htjedоše da budu pod okriljem
zastave nam ponosne.

Plavo-žute boje
i zvjezdica bijela
duše naše poje
poput pravog vrela.

Bogata je ona
ukrasima mnogim
to zna svaki čovjek
koji kroz nju hodi.

Pogledaš li Drinu, Unu ili Vrbas
zapitaš se: „Šta je to sloboda!?“
Svi ti riječni tokovi viču na sav glas:
„Slobodan je svako ko kroz Bosnu hoda.“

Svakog prvog marta
duša biva mirna
na sve strane odjekuje
„Jedna si jedina!“



Hor Medrese na Šehidskoj dovi u Žepi

U ponedjeljak 27.7.2020. godine, u Žepi je obilježena 25. godišnjica pada ove zaštićene zone Ujedinjenih nacija. Program je započet intoniranjem himne Bosne i Hercegovine ispred spomen obilježja, a nakon toga je otvorena Ratna spomen soba Žepske brigade Armije Republike Bosne i Hercegovine. U džamiji „Mehmeda ef. Hajrića“ prigodan program izveo je hor naše Medrese, a zikr su proučili derviši Hadži Sinanove tekije iz Sarajeva. Svršenici Gazi Husrev-begove medrese, proučili su suru El-Feth i nekoliko ilahija. Obilježavanju su, pored manjeg broja gostiju zbog pandemije uzrokovane korona-virusom prisustvovali, potpredsjednik Republike Srpske, gospodin Ramiz Salkić i muftija goraždanski Remzija ef. Pitić, koji je na kraju programa proučio dovu.



Održan trening Mreže vijeća/savjeta učenika Bosne i Hercegovine

U periodu od 9.10. do 11.10.2020. godine, održan je trening Mreže vijeća/savjeta učenika Bosne i Hercegovine. Treningu je ispred Kantona Sarajevo, kao zamjenica predsjednika i glasnogovornica Mreže vijeća učenika Kantona Sarajevo, prisustvovala učenica četvrtog razreda naše škole, Berina Musić. Trening je bio prilika da

Posjeta Muftijstvu banjalučkom

U petak, 25. septembra, Gazi Husrev-begova medrese organizirala je izlet u Banja Luku za svoje uposlenike tehničke službe. Cilj putovanja bio je obilazak Ferhat-pašine džamije i novoosnovane Medrese „Reis Ibrahim-ef. Maglajlić“ u Banja Luci. Izlet i posjetu Muftijstvu banjalučkom predvodio je direktor Gazi Husrev-begove dr. hfz. Mensur Malkić sa saradnicima. Naše izletnike su dočekali i lijepo ugostili glavni imam Medžlisa Islamske zajednice Banja Luka Adnan-ef. Jusić i direktor Medrese Muris-ef. Spahić sa saradnicima. Pored obilaska džamije i novoosnovane Medreses, uposlenici su imali priliku posjetiti tvrđavu Kastel, prostorije Medžlisa i urbanu jezgru Banja Luke.



se analizira dosadašnji rad vijeća/savjeta, kao i da se uradi plan aktivnosti za naredni period. Treningu su prisustvovali predstavnici svih kantona i regija u Bosni i Hercegovini.

Učenici Medrese „Reis Ibrahim-ef. Maglajlić“ posjetili Gazi Husrev-begovu medresu

U subotu, 12. septembra 2020. godine, učenici prvog razreda Medrese „Reis Ibrahim-ef. Maglajlić“ iz Banja Luke posjetili su Gazi Husrev-begovu medresu u Sarajevu. Dočekao ih je direktor Medrese, dr. sc. hfz. Mensur Malkić, i uputio riječi tople dobrodošlice. Direktor je iskoristio priliku da kao „zlatnoj generaciji“, uputi čestitke učenicima i učenicama što su upisali banjalučku medresu koja je nova vrijednost i novi biser Muftijstva banjalučkog, na čelu sa muftijom mr. Nusret-ef. Abdibegovićem, a koja je zbog svojih specifičnosti ponos muslimana naših prostora. Također, direktor Malkić je prisutne upoznao s historijatom Gazi Husrev-begove medrese, planom i programom, nastavnim i vannastavnim sadržajima i aktivnostima, te o uspjesima koje su, u proteklih nekoliko godina, postigli učenici i učenice Gazi Husrev-begove medrese. Pored Medrese, učenici i učenice su posjetili su Kuršumliju medresu i Hanikah, a potom i Gazi Husrev-begovu džamiju.



Učenici Medrese na takmičenju hifza u Tešnju

Medžlis Islamske zajednice Tešanj zajedno sa Udruženjem Bošnjaka „Vrijeme-Zeman“ i ove godine organizirali su takmičenje iz hifza u Tešnju. Među mnogobrojnim učesnicima iz cijele Bosne i Hercegovine, zapažene rezultate ostvarili su učenici naše Medrese. Učenik trećeg razreda, Bilal Hamidović, osvojio je treće mjesto u kategoriji 5 džuzeva, dok su se među pet najboljih u kategoriji sure El-Maide, našli Abdel Monem Abdelrahman, koji je osvojio četvрto mjesto, i Abdullah Ait Idir, koji je osvojio prvo mjesto. Koristimo priliku da česitamo našim učenicima na postignutom uspjehu.



Koordinator TIKA-e za BiH gospodin Muhammed Unal u posjeti Medresi

U četvrtak, 27. avgusta 2020. godine, Gazi Husrev-begovu medresu posjetio je koordinator TIKA-e za Bosnu i Hercegovinu gospodin Muhammed Unal. Gospodina Unala primio je direktor Medrese dr. hfv. Mensur Malkić sa pomoćnikom direktora za internat mr. Dževadom Plehom. Tema sastanka bio je nastavak započetih aktivnosti na projektu rekonstrukcije i adaptacije zgrade ženskog odjeljenja Gazi Husrev-begove medrese. Razgovori o ovom projektu započeli su u septembru 2017. godine nakon susreta direktora Malkića sa visokom delegacijom Vlade R. Turske na čelu sa zamjenikom premijera gospodinom Hakanom Čaušogluom i ambasadorom R. Turske u Bosni i Hercegovini nje. Haldunom Kočom tokom posjete Gazi Husrev-begovo džamiji u septembru 2017. godine. Od tada do danas, u saradnji sa TIKA-om, urađen je glavni projekat rekonstrukcije i adaptacije zgrade ženskog odjeljenja Gazi Husrev-begove medrese i osigurane potrebne dozvole. Prošle godine je projekat preveden na turski jezik i dostavljen TIKA-i.



Potpisan sporazum o finansiranju rekonstrukcije dvorišta Medrese

Općinski načelnik mr. Ibrahim Hadžibajrić i direktor Gazi Husrev-begove medrese dr. hfv. Mensur Malkić su 22. septembra 2020. godine potpisali ugovor o finansiranju II faze rekonstrukcije dvorišta Gazi Husrev-begove medrese, prema kojem će Općina Stari Grad u potpunosti finansirati ove radove iznosom od 70.900 KM. Prva faza rekonstrukcija dvorišta završena je prije dvije godine i također je finansirana iz budžeta Općine Stari Grad, iznosom od 99.000 KM. Završetkom druge faze, kompletno dvorište bit će rekonstruisano, a po prvi put Gazi Husrev-begova medresa dobit će i adekvatan prilaz za osobe sa invaliditetom. Pored rekonstrukcije dvorišta, Općina Stari Grad finansirala iznosom od 10.000 KM radove na izgradnji spomen-obilježja poginulim imamima za vrijeme agresije na BiH 1992-1995, koje se također nalazi u dvorištu Medrese. Načelnik Hadžibajrić i direktor Malkić, u prisustvu saradnika obišli su dio dvorišta koji treba biti rekonstruisan, kao i onaj u kojem su radovi već završeni, a radovi bi trebali početi vrlo brzo.



Bijeg

Ništavilo. Praznina i bezvremenost, zbumjenost i nedorečenost, jaz, šupljina, haos u svijetu - i onda se pojavi čovjek, stvorene nemarno za vlastite postupke, izgovorene riječi, kojem vlada haos u glavi poput najžešćeg vrtložnog vjetra i kojeg isti stišće, tuši i sputava, baca na dno, pa ni sam ne vidi haos oko njega. On se guši u mislima, stoe mu nad vratom poput najokrutnijeg smrtnika, okovan je lancima misli i duboko upetljan među njima a ključ katanca već odavno hrđa u mulju oceana. Učen je da su nijanse bitne, da je svjetla važnija od tamne a da su samo jedne Riječi ispravne kojima se može služiti, i da postoji samo jedan ispravan put i poziv...

Čujem, govore: "Naš je! Nek' pođe s nama", a on gleda izgubljeno, kao da govore nekim tajnim jezikom i preispituje se čiji je i čiji bi trebao biti? Govorili su mu da je bolje prešutjeti i pustiti druge, iskusnije, da ti kroje sudbinu i daju smjernice za šumske puteve jer su već kročili njima, a nije svjestan da tamo, baš iza onog grma, leži početak staze koji je već utaban i nije trnovit - to je ono što ga tuši, što mu ne da noćima da zaspí. Uviđa vlastiti propust u učenju ali ne zna gdje je pogriješio - pokušava pobjeći, no zaista je besmisleno bježati od vlastite sjene

zapravo istinski i krajnji cilj svakog ponaosob da svoj život usmjerava ka ulazi mosta - da svako od nas treba biti dodirna tačka između dvije obale, između dvije krajnosti, suprotnosti ili možda čak i sličnosti. A često i mostovi stradaju, pokleknu i pretrpe najgore, ipak takva ih sudbina zadesi, ali ostanu ustrajni i čvrsti. Ključ s dna oceana je izvađen iz mulja i suši se na pjesku. Hrdū će biti teško skinuti, ali polahko, vrijeme će donijeti svoje. Upravo počinje.

Srebrenica

Nazalost, zbog globalne pandemije koja je zadesila cijeli svijet 25. godišnjica genocida u Srebrenici održana je u drugačijim uvjetima. Iako nismo fizički mogli prisustvovati, naše misli i srca su bili u Srebrenici, sa majkama i djecom Srebrenice koji su ove godine ukopali svoje najbliže. Tradicija koju naša škola godinama njeguje jeste da svaka generacija u drugom razredu posjeti Srebrenicu i Memorijalni centar u Potočarima. Ove godine, nazalost, zbog pandemije uzrokovane korona virusom, drugi razredi nisu u mogućnosti posjetiti grad prekriven velom tuge, te osjetiti vjetar koji puše i ostavlja prazninu u svakom insanu.

Nikada neću zaboraviti taj dan kada sam kao učenica drugog razreda posjetila Memorijalni centar u Potočari-



ma. Iako sam i ranije imala priliku posjetiti Potočare, odlazak sa našom školom bio je poseban i dirljiv trenutak za mene. Srebrenica je pust grad o kojim se mnogo priča, ali grad koji šuti sa svojim praznim ulicama. Nažalost, prva asocijacija na spomen ovog grada je pokolj nad Bošnjacima u julu 1995. godine. Srebrenica je puno više od mračnog doba u historiji naše domovine, Bosne i Hercegovine. Ona je podsjetnik na užasnu cijenu koju su platili naši šehidi. Drago mi je što sam imala priliku da vidim Srebrenicu i slušam priče majki poginulih šehida, čijim suzama je natopljena bosanska zemlja. Iako je prošlo 25 godina od genocida u Srebrenici, bol je još uvijek istog intenziteta. Postoje

majke koje još uvijek čekaju povratak svoje djece i nadaju se pronalasku njihovih posmrtnih ostataka kako bi pronašle smiraj, a hiljade ljudi iz svih dijelova svijeta svake godine dolaze u Srebrenicu i odaju počast šehidima koji su natopili bosansko tlo. Obilazak Srebrenice i Memorijalnog centra urezaao je neizbrisiv trag u naša srca. I sad me obuzme isti osjećaj kao i tog tmurnog, jesenjeg dana kada se na kapiji Memorijalnog centra u Potočarima ispred mene ukazalo polje bijela nišana. Utjeha i poruka

svima koji posjete Potočare jesu riječi Svevišnjeg u Uzvišenom Kur'antu: "I ne recite za one koji su na Allahovom putu poginuli mrtvi su, ne oni su živi, ali vi to ne znate."

Mi nikada ne smijemo zaboraviti naše šehide, niti dozvoliti da se genocid u Srebrenici zaboravi. Moramo sa mnogo snage i strpljenja nastaviti borbu za svoja prava, i tragati za pravdom i istinom. Najbolje i najjače oružje u toj borbi jeste znanje, a na važnost znanja nam ukazuje i prva objava gdje naš Stvoritelj kaže: "Uči u ime Allaha koji stvara..."

Kao što je rat koji je zadesio Bosnu i Hercegovinu 90-ih godina prošlog stoljeća bio nemilo iskušenje, tako je i ova pandemija iskušenje za ljude širom svijeta. Uz pomoć Allaha, dž.š., prebrodit ćemo i ovo iskušenje i izaći ćemo kao jači i bolji vjernici i ljudi, a učenici sadašnjih drugih razreda će također imati priliku da posjete i svjedoče genocidu u Srebrenici.

Slobodno vrijeme je ključ uspjeha

Koliko smo samo puta požalili za trenucima prošlog vremena, za trenucima koji se ne mogu vratiti niti ponoviti?! Zadovoljstvo i sreća pojave su koje se rijetko sreću. Sitni, ali veoma značajni koraci mogu dovesti do zadovoljstva duše bez većih materijalnih ulaganja. Malo volje i drugačiji pristup slobodnom vremenu i organizaciji samog mogu poboljšati raspoloženje i samim tim dovesti do uspjeha. Mnogo vremena provodimo tražeći razlog zbog kojeg nas je nešto snašlo i krivca što nismo uspjeli završiti određeni posao.

Jedan od predznaka Sudnjeg dana je i to da neće biti bereketa u vremenu pa će mjeseci izgledati kao kratki dani. Mi smo nažalost svjedoci sve većeg nedostatka vremena. Život je takav, satkan od mnoštva sitnih trenutaka koji grade vrijeme od mnoštva malih dijelova koji čine velike, poput šarene slagalice. Svaki djelić dobiva svoj smisao sklapajući se tek sa drugim. Želje za vraćanje životne kazaljke unazad su samo gubljenje djelića budućnosti. Upravo ljudi tu najviše griješe. Više vremena provedu žaleći za prošlosti nego radeći za bolje i koristeći svaki minut slobodnog vremena za ostvarivanje svojih ciljeva.

Čovjek kada spozna pravu vrijednost vremena, te onda spozna i vrijednost života. Tek tada čovjek postaje svjestan da mu je svaki novi dan zapravo nova prilika koja zavisi samo od njega. Vrijeme brzo prolazi ne pitajući nikoga da li je u dobru ili zlu. Na ovom svijetu naše vrijeme je ograničeno. Svaki

sat, svaki tren za nas predstavlja blagodat. Kažu: „Vrijeme je novac!”, ali slobodno vrijeme je i više od toga jer to je bitna tema čovjekovog života. Vrijeme je sudija koji nema srce, pa zasučimo rukave i iskoristimo ga na pravi način. Ovo treba da bude pouka mladima kako da koriste vrijeme koje je pred nama, ne dozvoljavati besposlicama da oduzimaju naše prilike za bolje sutra. Vrijeme je život koji te stavlja na kocku.

Trebamo težiti da vrijeme zapamtí naše ime, za najboljeg druga uzeti slobodno vrijeme, jer dobar i iskren drug za vječnost, a vječnost je rezultat dobro iskoristenog vremena. Zato slobodno vrijeme iskoristimo kao blagodat koju nam je dao naš Gospodar, jer shvatimo da vrijeme prolazi a za njega ćemo polagati račun.

VRIJEME JE SABLJA, AKO TI NJEGA NE POSJEĆEŠ, POSJEĆI ĆE ONO TEBE! BUDIMO POBEDNICI U BORBI SA VREMENOM!

Mevlud u našoj tradiciji

Muhamed a.s., njegovo rođenje obilježavaju muslimani širom svijeta i upravo riječ mevlud označava rođenje Poslanika a.s. Pored rođenja Muhammeda a.s., riječ mevlud nosi i značenje religijskog spjeva u kojem se s mnogo emocija, ljubavi i u duhu islama opisuje rođenje i život Allahovog miljenika, Muhammeda a.s.

Već u doba samoga Poslanika a.s., jedan od najpoznatijih pjesnika tog doba, bio je Hasan ibn Sabit, koji je spjevao stihove u čast Poslanika a.s. Iako su već tada postojali spjevovi o ljubavi prema Poslaniku a.s., ipak se sa obilježevanjem mevluda u formi mevludske svečanosti kakve i danas imamo, započelo mnogo kasnije. Neki muslimanski vladari u 4. stoljeću po Hidžri započeli su to s ciljem da probude osjećaj ljubavi prema Poslaniku a.s. kod naroda.

Mevlud i tradicija njegovog obilježavanja u Bosni je stigla s Osmanlijama i dugo se mevlud u Bosni



Obilježavanje mevluda u Gazi Huvrev-begovoj džamiji

učio na turskom jeziku. O tome kako su prvi muslimani u Bosni obilježavali mevlud, ne zna se mnogo, no mevlud i mevludske svečanosti spominju se u Ljetopisu Mula Mustafe Bašeskije te u djelu Antona Hangija, Život i običaji muslimana Bosne i Hercegovine. Obilježavanje mevluda spominje se u Gazi Husrev-begovoj vakufnami 1531. godine, a rasprostranjenost njegovog učenja kod muslimana se veže za to što je sultan Murat III od 1588. godine uveo mevludske svečanosti u cijelom Osmanskom Carstvu.

Prvi mevlud na bosanskom jeziku jeste mevlud hfv. Saliha Gaševića iz 1296. godine po Hidžri koji je i danas ostao jedan od najpoznatijih mevluda na našim prostorima. U BiH muslimani Poslanikovo rođenje obilježavaju organiziranjem mevludske svečanosti u džamijama na kojima se uče mevludi, čita Kur'an te održavaju prigodna predavanja. Muslimani u BiH pridaju veliku važnost i značaj mevludu jer on predstavlja spomen na rođenje posljednjeg Poslanika i čovjeka koji je posljednju Objavu prenio i objasnio ljudima te zato što je mevlud sredstvo jačanja ljubavi i vjerskih osjećanja. To je spomen na dan kada je Uzvišeni Allah iz svoje neizmjerne milosti, dao muslimanima najsavršeniji dar, Poslanika Muhammeda a.s.

Krajnji cilj mevluda jest da čovjeka upozna s time tko je zapravo bio naš Poslanik te ga na taj način pokuša navesti da uvidi vlastite prijestupe u djelima

i ponašanju. Cilj mevluda jeste i taj da čovjeku prikaže kolika je zapravo bila Poslanikova ljubav prema svim ljudima i u njemu probudi onaj urođeni osjećaj ljubavi prema Poslaniku zbog kojih će se u čovjeku roditi težnja za promjenom vlastitog ponašanja i izgradnjom vrijednosti kao što su plemenitost, empatija, dobročinstvo i mnogih drugih koje je posjedovao naš Poslanik.

Mevlud i mevludske svečanosti su s pravom neizostavan dio bosanske kulturne tradicije i duhovnog naslijeđa. O važnosti mevluda se danas ne govori dovoljno i često se ona zanemaruje, a potrebno je da bude potpuno suprotno. Naime, kod mladih je potrebno razvijati svijest o važnosti mevluda, mevludske svečanosti i poruka koje one u sebi kriju, kako bi oni te poruke mogli prenijeti na sljedeće generacije i tako sačuvati mevlud i njegovo mjesto u bosanskoj tradiciji te samim time postići i krajnji cilj, očuvanje bosanskog identiteta.

Tradicionalni mevlud u Gazi Husrev-begovoj džamiji

Obilježavanje mevluda u Gazi Husrev-begovoj džamiji je posebno značajno i zbog svoje duge tradicije uvijek predstavlja jednu od centralnih svečanosti u Bosni i Hercegovini. Hor Gazi husrev-begove medrese redovno učestvuje u realizaciji programa mevluda. Zbog okolnosti u vezi sa pandemijom, ove godine, hor Medrese nije učestvovao a program su u četvrtak 29.10.2020. godine izveli imami medžlisa IZ Sarajevo kao centralni mevludski program u okviru manifestacije Dani o Allahovom Poslaniku „Selam, ya Resulallah“.

Literarni konkurs "Mevlud – milost svjetovima, radost ljudima"

U sklopu manifestacije "Selam, ya Resulallah",

povodom 12. rebiul-evela, dana rođenja Muhameda a.s., u Gazi Husrev-begovoj medresi raspisan je literarni konkurs pod nazivom "Mevlud – milost svjetovima, radost ljudima" za učenike i učenice Medrese.

Komisija za odabir naboljih radova, u sastavu prof. Mirzet Hamzić, prof. Maida Ćerimović i prof. Edin Balta, najboljim je proglašila radove čiji su autori:

1. Esma Hadžić, IIIb
2. Lamija Basarić, IIId
3. Fatima Hudović, IIIc

Čestitamo učenicima čiji su radovi bili najbolji na konkursu.



Obilježavanje mevluda u Gazi Huvrev-begovoj džamiji





Skrušenost u namazu – šta je i kako je postići?

"Ono što žele – vjernici će postići, oni koji molitvu skrušeno obavljaju". (Al Mu'minun)

Namaz je drugi stub vjere, odmah nakon šehadeta. Vjernik putem namaza direktno komunicira sa Uzvišenim Allahom dž.š, pet puta na dan. Namaz je hrana za našu dušu, jer kao što hranimo naše tijelo, isto tako moramo hraniti našu dušu da ne bi zamrla u duhovnom pogledu. S obzirom da se namaz sastoji od forme i suštine, mi ne bismo smjeli zanemariti ni jedno ni drugo, ali isto tako ne bismo trebali praviti disbalans. Na primjer, previše usmjeravanje pažnje ka formi namaza je jedna od šeitanovih zamki, jer će tako čovjek u potpunosti biti fokusiran na to da li je određeni pokret izvršio pravilno ili ne. Tada njegovo pristustvo u namazu biva ograničeno, te namaz biva sveden samo na puke pokrete, a zanemaruje se primarni cilj i uloga koju on ima – odgoj čovjeka i povećanje bogobojaznosti. Za postizanje takvoga cilja, čovjek mora imati, osim forme, skrušenost i poniznost u namazu. Ko postigne skrušenost u namazu osjetit će slast ibadeta i imana, zato je Allahov Poslanik a.s., govorio: "Smiraj moga oka je u namazu."

Skrušenost je glavnina, srž namaza i namaz bez nje je kao tijelo bez duše. Zbog toga čovjek treba da stupi u namaz sa strahom, skrušenošću i poniznošću. "Skrušenost je smirenost srca, osjećaj strahopoštovanja, stida i veličine pred Onim pred kojim stojš u namazu." Mjesto skrušenosti je

srce, a plodovi skrušenosti odražavaju se na udove klanjača. Za postizanje skrušenosti u namazu, potrebno je spremiti svoje misli i srce prije namaza, a zatim ih držati budnim i u toku samog namaza. Mnogo je savjeta koji nam mogu pomoći u postizanju skrušenosti, a mi ćemo ovdje navesti neke:

1. Priprema za namaz – abdest, odijelo i mjesto klanjanja

Abdestom se čisti tijelo od materijalnih prljavština, te srce od nematerijalne nečistoće i prljavštine grijeha. Vjerovjesnik a.s., je propisao da osoba kada završi uzimanje abdesta prouči šehadet, a potom kaže: „Allahu moj, učini me od onih koji se često kaju i od onih koji se mnogo čiste!“

Odjeća treba biti lijepa i uredna, kako bismo što ugledniji stali pred Uzvišenog Gospodara.

Ambijent u kojem klanjamo također mora biti prigodan susretu sa Uzvišenim, bez ikakvih smetnji i stvari koje odvraćaju pažnju (TV, obavijesti na mobitelu i sl.).

2. Svest da se čovjek nalazi pred Stvoriteljem

Čovjek se u namazu nalazi pred Uzvišenim Allahom dž.š., Stvoriteljem svega što postoji, On upravlja cijelim svemirom, Njegovo je sve na nebesima i na Zemlji i u tom trenutku sa Njim razgovara. Čovjek će i na Sudnjemu danu stajati pred Uzvišenim Gospodarom i polagati račune za svoja djela,

stoga se treba truditi da iskrenim i skrušenim obavljanjem namaza na ovome svjetu sebi olakša poziciju na budućem.

Allahov Poslanik a.s., rekao je: "Kada je vjernik na namazu, on razgovara samo sa svojim Gospodarom..." (Buhari)

3. Razmišljanje o značenju onoga što se uči na namazu

S obzirom da učenici medrese uče arapski jezik, odličan način za praktikovanje i primjenjivanje istog u životu jeste upravo namaz. Kada čovjek razmišlja o onome što uči na namazu, sigurno će postići veću skrušenost i poniznost. Od Sa'da b. Muaza r.a., prenosi se da je rekao: "Kada sam u namazu, ne mislim ni o čemu osim o onome što govorim."

4. Upotpunjavanje namaskih rukova

Od Katade r.a., prenosi se da je Poslanik a.s., rekao: "Najgori kradljivac je onaj koji krade od svoga namaza". Katade r.a., upitao je: "A kako krade od svoga namaza?". Poslanik a.s., odgovorio je: "Ne upotpunjavajući ruku u i sedždu u namazu".

Svaki pokret treba obavljati smireno i polahko, jer nam žurba otežava razmišljanje i remeti koncentraciju.

Na rukuu u potpunosti iskazujemo svoju pokornost Uzvišenome, tijelom, riječima i srcem, a na sedždi smo najbliži svome Gospodaru.

Pravu slast ćemo osjetiti onda kada iskreno odužimo sa tim dijelovima namaza.

5. Razmišljanje o smrti

Poslanik a.s., rekao je: "Sjeti se smrti u svom namazu. Doista čovjek kada se sjeti smrti u svom namazu, to će mu pomoći da uljepša svoj namaz i klanja namaz kao čovjek koji je siguran da mu je to zadnji namaz."

U svaki namaz bismo trebali ulaziti kao da nam je posljednji, jer će jednom to sigurno biti. S tim mišljenjem i s takvim pristupom, bićemo posebno motivirani da što ljepe i skrušenije obavimo namaz.

Da nas Allah učini od onih koji svoje namaze ponizno i sa skrušenošću obavljaju!



Gazi Husrev-begovoj medresi poklonjeni Kur'ani na Brailleovom pismu

Upetak, 13. novembra 2020. godine direktor Gazi Husrev-begove medrese dr. hfvz. Mensur Malkić primio je od Senahid-ef. Bristrića, donedavnog ambasadora Bosne i Hercegovine u Kraljevini Saudijskoj Arabiji, dva primjerka Kur'ana na Brailleovom pismu koje su poklonili Abdurrahman bin Nasir El-Resini i Bedr bin Nasir El-Resini za potrebe slabovidnih učenika Medrese.

Ovaj vrijedni poklon pružit će šansu slabovidnim učenicima za savladavanje nastavnih sadržaja iz predmeta Kiraet u Gazi Husrev-begovoj medresi. Jedan primjerak Kur'ana na Brailleovom pismu biće uručen slabovidnom učeniku prvog razreda u tekućoj školskoj godini, a drugi primjerak će biti smješten u školsku biblioteku.

Direktor hfvz. dr. Mensur Malkić se zahvalio Senahid-ef. Bristriću a posebno donatorima na poklonu.



Posjeta Reisu-l-uleme Gazi Husrev-begovoj medresi


Usrijedu, 07. oktobra 2020. godine reisu-l-ulema Islamske zajednice u BiH Husein-ef. Kavazović posjetio je Gazi Husrev-begovu medresu u Sarajevu u povodu početka školske 2020/2021. godine. U pratnji direktora Medrese dr. hfvz. Mensura Malkića, upravnika mr. Dževada Pleha i pedagogice Sabahete Ahmetagić, Reisu-l-ulema je posjetio dva odjeljenja prvog razreda kojom prilikom je čestitao učenicima i učenicama prvog razreda upis i početak školovanja u najstarijoj i za Bošnjake najznačajnijoj obrazovnoj ustanovi čiji svršenici stoljećima hizmete i vode ovaj narod kroz sva njihova iskušenja. Izrazio je nadu da će i oni svojim radom i zalaganjem ispuniti očekivanja Islamske zajednice i svojih roditelja da budu vrijedni, uspešni i pošteni, da će nastaviti da štite i promiču vrijednosti svoje vjere i svoga naroda ulažeći prije svega u svoje obrazovanje, da postignu zvanja magistara i doktora nauka. "Vama je pripala čast da uđete u ove učionice što mnogim vašim vršnjacima nije pošlo za rukom. Očekujemo da opravdate povjerenje koje vam se ukazuje, a ja kao reisu-l-ulema i Islamska zajednica, sve čemo činiti da vaši uvjeti u kojima učite i radite budu što bolji", poručio im je Reisu-l-ulema. Nakon obilaska učenika upriličen je svečani program u povodu otvorenja obnovljenog amfiteatra u zgradi muškog odjeljenja Gazi Husrev-begove medrese u prisustvu reisu-l-uleme dr. Husein-ef. Kavazovića, predsjednika Sabora Islamke zajednice u BiH Safeta Softića, zamjenika reisu-l-uleme prof. dr. Enesa Ljevakovića, direktora uprava, organizacionih jedinica i ustanova Islamske zajednice, te predstavnika donatora, projektanata, nadzora i izvođača radova.



Vijesti iz svijeta

SpaceX počeo javno testanje StarLink mreže

Starlink je projekat američke kompanije SpaceX, a radi se o sistemu uvezanih satelita u niskim orbitama Zemlje koji imaju ulogu održavanja globalne pokrivenosti internet konekcijom. Elon Musk, osnivač kompanije, tvrdi da je za ovakav poduhvat potrebno minimalno 12.000 satelita. Trenutno je u funkciji 800, a 900 je potrebno za veće operativne mogućnosti. Testiranje se vrši u SAD-u i Kanadi, a testiranju projekta se moguće priključiti putem web stranice SpaceX-a. Korisnici moraju izdvojiti 499 dolara za opremu i 99 dolara mjesečno za usluge. Iz kompanije tvrde da je brzina interneta između 50mb/s i 150mb/s uz latenciju od 20 do 30ms.



Razvijanje aviona na hidrogenski pogon

Proizvođač aviona Airbus radi na razvijanju pogona za komercijalne avione koji koriste hidrogen kao gorivo. To bi značilo znatno smanjenje uticaja avijacije na klimatske promjene. Guillaume Faury iz ove kompanije je istakao da imaju tri koncepta modela i ovaj plan je nazvao historijskim trenutkom za komercijalnu avijaciju, objavio je BBC. Konačan proizvod se može očekivati za 2035. godinu. Prema navodima Airbusa, jedan od njihovih aviona sa hidrogenskim pogonom mogao bi prevoziti 200 putnika i preći više od 3.200 kilometara. Ipak, postoje određene mane kod implementacije ove tehnologije, od kojih se izdvaja velika količina novca koja je neophodna za izgradnju infrastrukture na aerodromima koja bi omogućila punjenje aviona hidrogenom.


Veliko otkriće NASA-e na površini Mjeseca

NASA je objavila novo važno otkriće u istraživanju Mjeseca, a radi se o pronaštu vode na njegovoj površini. Zahvaljujući specijalno modifikovanom Boeingovom modelu 747, opremljenog teleskopom koji ima sposobnost promatranja infracrvenog spectra nazvanog SOFIA, naučnici su utvrdili da na površini Mjeseca pretežno postoji O, a ne hidroksil. Drugih detalja još uvijek nema, ali iz NASA-e poručuju da novo otkriće ide u prilog nastojanjima te agencije da otkriju nove stvari o Mjesecu. "Ovo otkriće je vrlo značajno", kazao je Shuai Li, naučnik s Univerziteta na Havajima i koautor jedne od novih studija.



Naučnici pronašli novi organ u grlu dok su provodili istraživanje o raku prostate

Ranije su stručnjaci mislili da postoje samo mikroskopske pljuvačne žlijezde unutar nazofarinka iza nosa, ali su istraživači nizozemskog instituta za rak otkrili novi set pljuvačnih žlijezda dužine skoro 2 cm. Novootkrivene žlijezde su nazvali tubarnim pljuvačnim žlijezdama zbog njihovog položaja nad hrskavicom koja se zove torus tubarius. Prilikom PSMA PET-CT skeniranja doktori ubrizgavaju pacijentu radioaktivni "trag". Ovaj se tragač dobro veže za protein PSMA koji je povišen u ćelijama karcinoma prostate, a također je vrlo dobro u otkrivanju tkiva pljuvačnih žlijezda. Istraživači su rekli da će se novootkrivene žlijezde vjerovatno koristiti za podmazivanje gornjeg dijela grla iza nosa i usta, piše Sky News. Kako bi potvrdili svoje otkriće naučnici su, predvođeni onkologom Wouterom Vogelom, pregledali 100 pacijenata i otkrili da svi imaju te žlijezde, a secirali su i područje nazofarinka dva tijela i rezultati su bili isti.



Pretjerivanje u jelu

Allahov Poslanik, a.s., je kazao: „Goru posudu od stomaka čovjek ne može napuniti. Zaista je sinu Ademovom dovoljno nekoliko zalogaja koji će mu kičmu uspravnom održati. A ako ga već mora puniti, neka trećinu odredi za hranu, trećinu za piće i trećinu za disanje.“ (Tirmizi, Ibn Madže, Hakim)

Navedeni hadis predstavlja opće načelo za sve osnove medicine. Prenosi se da je čuveni doktor Ibn Ebu Masivejh, kada je pročitao ovaj hadis u Ebu Hajsemovoj knjizi, rekao: „Kada bi se ljudi pridržavali ovih riječi, bili bi pošteđeni bolesti i bolova, a bolnice i apoteke bi se pozatvarale“. Svi naučni krugovi koji se bave pitanjima ljudske ishrane i zdravlja, ukazuju na obaveznost pridavanja pažnje ishrani, konkretno uspostavi ravnoteže između energije koja se troši i energije koja se unosi u organizam putem hrane, a hadis jasno ukazuje na tu činjenicu.

Vjernik mora imati na umu da je prejedanje jedna od šeđtanovih kapija i uzrok bolesti srca. Plemeniti ashabi i časni prethodnici imali su običaj konzumirati hranu u onoj mjeri koja će im pribaviti snagu za izvršavanje svakodnevnih dužnosti i obaveza. Svaki zalogaj za njih je poput ibadeta, a nikako tek puko zadovoljavanje prohtjeva. Poznato je da je Resulullah, a.s., upozoravao na pretjerivanje u ibadetu, koji je nesumnjivo

svrha postojanja ljudskog roda, pa kakvu bi onda korist pretjerivanje u jelu moglo donijeti mu'minu? Mudri Lukman, a.s., savjetovao je svoga sina riječima: „O sinko moj, kada se stomak napuni, misao se uspava, mudrost zanijemi, a organi tijela klonu pa prestanu robovati.“

„Onaj ko zna pravu mjeru svome stomaku, zna i kako će ispovijediti svoju vjeru. Onaj ko je sposoban kontrolirati svoju glad, domogao se lijepi naravi. Od gladnoga je nepokornost prema Gospodaru daleka, a blizu je sitome. U najpozitivnije strane izglađivanja spada to što ono slabi strasti koje navode na sve vrste grijeha i što se njime savladava duša koja navodi na zlo. Izvor svih vrsta grijeha su strasti i nekontrolirana fizička snaga, a izvor strasti i fizičke snage je hrana, što znači da se sa smanjivanjem hrane smanjuju sve vrste strasti i fizičke snage. Sva sreća leži u tome da čovjek vlađa svojim nefsom, a nesreća da nefs vlada njime. Kao što se jogunasta životinja ne može ukrotiti drugačije nego glađu, jer sve što se više hrani sve je jača i jogunastija, tako isto se ne može ukrotiti ni nefs.“ (Ibrahim ibn Edhem, k.s.)

Navodi se predaja da je Uzvišeni Gospodar nakon stvaranja nefsa naredio mu da ide, međutim, on je odbio. Kada mu je naredio da dođe, opet je odbio. Kada ga je upitao: Ko

si ti?, odgovorio je: „Ja sam ja, a Ti si Ti“. Zbog svoje oholosti hiljadama je godina kažnjavan najtežim i najbolnjim mukama, a zatim ga je Gospodar ponovo upitao: Ko si ti? Nefs opet odgovori: „Pa, ko već?“ I Gospodar nastavi dalje sa pitanjem: A ko sam Ja? Nefs reče: „Pa, ko si Ti?“ Sve te silne godine kažnjavanja u užarenim i ledenim dolinama Džehennema samo su povećale njegovu oholost, te Gospodar naredi da se odvede u Dolinu gladi. Nakon hiljadugodišnjeg mučenja gladovanjem, doveden je ponovo pred Uzvišenog Koji mu postavi pitanje: O nefsu, ko sam Ja?, a nefs Mu ovaj put odgovori: „Ti si Bog, osim Kojeg drugog boga nema“. Navedena predaja potvrđuje riječi Ibn Edhema da je jedino gladovanje u stanju slomiti tvrdoglavost i oholost heve, te je iz tog razloga Svetog Gospodara propisao post kojim će insan terbijetiti svoj nef. Suprotno tome, pretjerivanje u jelu vodi do sigurne propasti, te povrh svega, zluradosti šeđtanove.

Jedanput je šeđtan upitan: „Ima li nešto što je sretnim učinilo?“

„Da“, reče Allahov neprijatelj, „gorio sam od sreće kada se Jahja, a.s., do sitosti najeo pa se onda u tako dubok san zaveo da je sabah prespavao.“

„A ima li nešto što te je unesrećilo?“


„Da, bio sam nesretan kad sam video da meleki svih sedam nebeskih sfera plaču sa njim zbog propuštenog mu sabaha. Tada sam krio samog sebe što ga ja lično nisam na sabah probudio.“

Uzvišeni Allah objavio je Musaau, a.s.:

O Musaa, kada Me spominješ, neka su tvoji organi ispražnjeni! Kada Me spominješ, budi skrušen i smiren! Kada Me spominješ, neka tvoj jezik bude iza tvog srca! Kada staneš pred Mene, stoj kao ponizni rob i obraćaj mi se srcem punim straha i iskrenim jezikom!

Prvo je spomenuta glad, jer ona čovjeka podsjeća na ovisnost o svome Gospodaru i pobudjuje plemenite osobine poput skrušenosti, bogobjaznosti, poniznosti i iskrenosti, te umanjuje potrebu za prekomjernim snom, bespotrebnim govorom, razbistrava um i pročišćava dušu.

Duši se ni u kojem slučaju ne smije prepustiti da se nekontrolirano povodi za svojim prohtjevima, čak ni u onome što je dozvoljeno, jer se čovjek u istoj onoj mjeri u kojoj se prepusti strastima, mora bojati da mu se na Sudnjem danu ne kaže: Vi ste u svom životu na Zemlji sve svoje naslade iskoristili i u njima uživali. (El-Ahkaf, 20.) Drugim riječima, čovjek će u onoj mjeri u kojoj se bude protiv svojih strasti borio i u njihovom ostavljanju ustrajavao, u blagodatima na onom svijetu uživati. A Allah zna najbolje!





Selam, ya Resulallah

Težina moga sna

Dok se sutan spušta
Na kapke mojih očiju,
Moje misli odjednom počinju da lutaju.
Da pobegnu žude.
Tamo, gdje im se tvoje riječi nude.
Da ih slušaju i upijaju,
Kao kap kišne rose.
Da me vjetrovi tamo gdje si ti nose.
Da je duši komad iskonskog neba,
Što je svjedočio tvom bivstvovanju.
Da sam oblak, da sam drvo,
Što zaklon nudiše tvom tugovanju
Da sam kamen u pećini Hira
Što bi svjedok tvoje osame
Pa da progovorit mogu po naredbi Njegovoj
I moje ti riječi obris osmijeha izmame.
Da sam barem bio leptir,
Što nekad izazva tvoje divljenje,
Da sam barem bio odsjaj mjesecine
Što u mrklim noćima ponudi ti osvjetljenje.
Šta bih dao da sam prašina,
Što podigoše tvoje stope,
Da vjetar medinski odnese moju sreću
Što ju tvoj blagoslovljeni korak obaspe.
Da sam Bogd'o bio riječ,
Što isplovi kroz tvoje mile usne,
Što usreći kaharne, ozdravi bolesne.
Šta bih sve dao, o voljeni, da sam bio kap suze,
Što se spusti niz tvoje radosno lice
Pa me duševni smiraj na trenutak obuze. Ispunjena
želja, letim poput ptice!

Ali ne,
Ja sam postao čovjek!
Odredbom Gospodara svjetova svih.
Da budem primjer da se dušom voli,
Iako to ponekad i boli..
Jer bi duša htjela da kuša
Barem djelić tvoga nura,
Ali Svevišnji je tako htio
Da te volim izdaleka

Jer sama pomen na tebe izaziva radost
I tako će biti do vremenskog isteka!
Jer ti si milost svjetovima,
Tvoj korak je blagoslovljen.
O, Muhammede, zar čovjek može biti toliko voljen?
I htio sam u snu da budem tlo,
Na kojem ti za ummet svoj si molio
Na kojem ti si plakao, Milostivog dozivao.
Da budem želja što po mislima ti je hodila,
Kako bi se moja duša tada preporodila..
Ali neka,
Ja sam ovdje da siguran dokaz budem.
Da iskrena ljubav osjeti se dušom.
Da tvoje riječi koje ne čuh-uzimam za istinu.
Da tvoje postupke koje ne vidjeh-uzimam za primjer.
I ko onda može da poruši tu ljubavnu čistinu?
Što užgajam u dnu srca svoga,
Moleći za tebe,
Čuvam ih od bura i oluja,
Da nikad ne izblijede.
Pa da prođe ova tegoba
I Gospodar ti dovede Njegovog skrušenog roba,
A u rukama mu pregršt ljubavi
Što samo za taj dan čuva
Da te sretne u Njegovom hladu.
I zaplače, ne povjeruje...
Da onaj san što je igrao ispod očnih sanduka,
Postao je tek nekadašnja muka.
A tad kad otvorim oči svoje,
Ispred mene tvoje najumilnije stope.
Zato ču zalijevati ovu ljubav,
Dovijeka nek me krasí!
Moja dova prema tebi jesu i moji uzdasi,
Što žude da te sretnu.
I Svemogućeg molim
Da do dana Sudnjega ne prestanem da te volim,
A kad te sretнем tada, nek moja ljubav poraste.
Da ti u društvu budem, mili Poslaniče!
Da to bude početak moje vječne priče

Mevlud – milost svjetovima, radost ljudima

Pišem o tebi,
o Resule,
ne da te riječima svojim uljepšam,
nego da svoje riječi tobom uljepšam

Jer ti si takav da
kada sretneš nekog u tami – obasjaš ga,
nesretnog – usrećiš ga
žednog znanja – napojiš ga

Kako se onda moj griješni jezik
usuditi može
da iznova griješi
kada tebe spomene, o Milosti?

Ni vidjeli te nismo,
o Resule,
ali ti si, ipak, sa nama
Jer ti i kad umreš, živ si

Odsjaj tvoj se vidi
i u trunku dobra našeg
pomilimo mače – ruke nam sjaj dobiju
jer poput tvojih postupaju

Očima nebo pogledamo,
veličajući Uzvišenog,
oči nam sjaj dobiju
jer poput tvojih postupaju

Hodeći mirno,
prolazniku se u lice nasmijemo,
pa i naše lice sjaj dobije

jer poput tvoga postupa


A pitam se kako li ćemo Gospodaru
dževab dati
ako drugi, koji za tebe ne mare,
ni u nama tvoj odsjaj ne ugledaju

Ako tvoju jednu riječ
pogrešno prenesemo,
u samo jednom smislu shvatimo
ili samo za sebe ostavimo

Umara nas ovaj dunjaluk,
o Resule,
ali na svu sreću,
na njemu smo samo putnici

Dosta na njemu nemira ima,
o Resule,
ali na svu sreću,
pokazao si nam kako da se nosimo sa njime

Crpmo mir od Onoga od Koga je mir
ne bi li nam se smilovao
i mir dao kad te u Džennetu ugledamo,
o Radosti!







Učenici 1A razreda su: Ahmed Ahmetspahić, Ismail Alibegović, Asim Aždahić, Rijad Bećirović, Maid Blitović, Alija Čaušević, Din Džananović, Davud Grabus, Muhamed Grbo, Ishak Ibrahimović, Emir Imamović, Benjamin Biser Ihtiman, Sakib Kapidžić, Bilal Likić, Bilal Likić, Muhamed Maglić, Edin Mamedović, Arif Moćević, Abdulah Mujezinović, Ismail Mujić, Omer Mujić, Elmir Muratović, Ahmed Behaudin Mušanović, Tarik Omeragić, Muaz Šabanović, Abdurahman Tabaković, Alija Tanjić, Imran Vođo, Faris Zejnilagić, Husejn Zubača, Ahmed Zukić

Razrednik: Edin Balta, prof.

Odgajatelj: hfz. Nedžad Ćeman, prof.



Učenici 1B razreda su: Adnan Bratanović, Ensar Bužo, Hasan Durmišević, Merjem Elfarahati, Zehrid Hasanović, Emina Hasić, Senad Hošić, Asim Husejnović, Mirza Kadrić, Amina Kahrimanović, Muhamed Kajmović, Amina Kehonjić, Ammar Klisura, Ajna Kobilica, Abdulgafar Kobilica, Fatih Kurtić, Hamza Macić, Amar Mulaosmanović, Nedžma Neimarlija, Ahmed Obračić, Hatidža Opardija, Emir Patak, Bakir Pepić, Edhem Salihović, Abdulkerim Selimović, Amina Selman, Ajša Zaimović, Ismail Zejnilović, Tahir Čelenka, Jusuf Šehović

Razrednica: Emina Čuturić-Brkić prof.

Odgajatelj: hfz. Nedžad Ćeman prof.



Učenice 1C razreda su: Aisha Abdel Monem, Ilhana Ašćerić, Azra Badžak, Aldina Bećirović, Emina Bećirović, Amina Bejtić, Nahla Bešlić, Ajša Bjelak, Merjema Efendić, Sumeja Fejzić, Sumejja Vehab, Hanan Komarica, Halima Išerić, Saida Leđen, Fatima Kapić, Nađa Oruć, Aiša Petrovac, Amina Gondžić, Amina Ramić, Asija Šiljak, Emela Zukorlić, Hana Gagula, Hurija Vatreš, Lamija Sakić, Merjem Karasalihović, Merjem Višća, Merjem Salkić, Naida Imamović

Razrednik: mr. Muhamed Mehanović prof.
Odgajateljica: Šehrizada Durović prof.



Učenice 1D razreda su: Adna Suljić, Adna Zuparović, Ajna Džananović, Ajna Fidani, Almina Velić, Amינה Pehlivanović, Amina Subašić, Amna Kljajić, Džejlana Bećirović, Ehlimana Hasagić, Emina Delić, Emina Efendić, Enisa Halač, Hadžer Duvnjak, Hadžera Beganović, Hadžera Hadžić, Hatidža Hadžić, Kanita Salihović, Lamija Avdić, Maida Žunjjić, Medina Ramić, Merjem Osmanagić, Merjema Osmanović, Muamera Husika, Mubina Rešidbegović, Randa Ćatić, Ranija Sulkić, Sabrina Vehab, Sara Gutić, Taida Nuhović

Razrednica: Maida Ćerimović prof.
Odgajateljica: Šehrizada Durović prof.



Kada bi me pitali zašto sam upisala medresu, ne bih vam znala dati tačan odgovor. Među mojim izborima uvijek su bile druge škole, ali ne i medresa. Bilo je sunčano popodne kad su u školu došli učenici medrese. U učioniku su ušle djevojke sa prelijepom odjećom i lijepo namještenom mahramom. Odisale su ljestvicom i nurom i zasjenile sve nas. Kada su ispričali o medresi njenoj ljepoti upitaše: „Da li ima neko ko želi upisati medresu?“, a tada je u razredu nastala puka tišina, niko ni riječ da progovori. Oni su izašli, a ja sa suzama u očima i leptirićima u stomaku počela razmišljati o upisu u medresi. Da samo znaju kakav su uticaj ostavili na mene. Dolazim kući i sa suzama u očima kažem mami da će upisati Gazi Husrev-begovu medresu, a ona sva začuđena i ponosna na mene, zagrlji me samo onako kako majke mogu zagrliti. Dolazak u medresu, rastanak od roditelja i onih koje volimo, teško pada iako znam da krećem na put na kojem samo uporni uspijevaju. Suze kao i one radosne poteku jer dolaziš u medresu. Dolaziš tamo gdje ćeš upoznati prijatelje, one koji će čitav život biti tu za tebe, jer prijatelji iz medrese ostaju prijatelji za čitav život. Odlaziš tamo gdje je najvažnija vjera u jednog Allaha. Ponovno bih donijela istu odluku i upisala Gazi-Husrev begovu medresu.

Ajna Džananović, Id

Upravo se bližio upis u srednju školu. Već su počele velike dileme. Jednoj petnaestogodišnjakini koja nije spremna samostalno donijeti odluku bilo je jako teško. Bilo je teško donijeti pravu odluku, odabrat put budućnosti. Danima su kružila pitanja „šta upisati“, pitanja bez odgovora. Trebalо je dugo vremena da odlučim jer ipak je to nešto što će me pratiti kroz cijeli život. Razmišljala sam o školi koja mi nudi dobro znanje, iako sve škole nude onoliko koliko je potrebno, ali rijetko koja škola da nudi „temelj budućnosti“. Taj temelj upravo daje medresa. Osim toga što nas uči o islamskim naukama, također ne zaostaje ni sa ostalim. Dani su sve brže i brže prolazili, ali odluke nisu dolazile. Dvoumice između raznih škola... Sve do jednog dana... Misli su zavladale dušom i šapnule „Šta misliš o medresi?“ Slušala sam priče starijih, bilo je svakakvih priča. Niko ne gleda iz istog ugla. Došao je kraj razmišljanja. Upisala sam medresu. Po pričama, po svemu što sam slušala i nije toliko lahko. Prije svega sam željela, prijateljice kao sestre, prijatelje kao braću, profesore kao prijatelje. Nije bilo lahko promjeniti sredinu, doći u novi grad, stvoriti svjetlost daljeg puta. Ali sve to za sebe. Za bolje sutra. U većini škola jedino što je bitno je obrazovna komponenta, ali u medresi nije tako jer pored obrazovanja tu je i odgojni proces. Svima nama je poznato da je medresa škola internatskog tipa. To je možda jedna posebnost medrese, jer tu nađeš drugu porodicu. Prije svega morala sam se pomiriti da će biti koliko uspona, toliko i padova. Jer sve je ovo život. Medresa je naša druga kuća. Druga porodica. Velika nada za bolje sutra.

Dovi, trudi se i ne odustaj!

Adna Suljić, Id

Medresa je puno više od škole, a to danas razumijem. Medresa je mjesto gdje imam priliku biti ono što jesam. Također to je mjesto gdje se stiču iskrena, prava prijateljstva i mjesto dobrih, iskrenih i moralnih ljudi. Medresa je pravi izbor za mladog muslimana, u ovom zlom i nepravednom svijetu, gdje će spoznati druge ljudе a najbitnije sebe.

Vrijeme odluke se bližilo, a ja po malo zabrinuta a ponajviše zbumjena i izgubljena. Nisam sigurna koju školu odabratи, gdje dalje, kojim putem, kamo se usmjerit? Brojna pitanja u mojoj glavi a nigdje odgovora. Mnogo puta mi je napamet pala ideja o upisu u islamsku srednju školu. Ali me uvijek nešto omelo u toj namjeri. Tako sam naivno slušala različita mišljenja ljudi i njihove osobne stavove o medresi. U mjesecu februaru 2020. sam dobila Zemzem. Tada nisam znala šta je to. Ispostavilo se da je to list Gazi Husrev-begove medrese. Listajući sam naišla na stranicu gdje su učenice prvog razreda pisale svoje priče kako, i zašto su upisale medresu. Jedan od članaka mi se posebno dojmio i to je glavni razlog zašto sam upisala ovu školu. Članak je pisala djevojka koja je objašnjavala kako je bila neodlučna, pisala je također kako je slušala različita mišljenja različitih ljudi i onda se upitala šta bi to nju usrećilo. U njenim riječima sam vidjela izgubljenu djevojku koja uporno hoda u mjestu - sebe. Zatim se ta djevojka prkosno i ponosno digla i napisala "Ako će mi muka biti učenje o Gospodaru i molba Gospodaru, neka mi to bude muka za cijeli život. Ako mi je zabranjeno nemoral, zlo, poroci, propast onda će braniti sebi cijeli život." Kada sam to pročitala emocije su me preplavile i donijela sam odluku. Ustrajala sam i trudila se do kraja školske godine i na kraju uspjela. Danas se susrećem sa različitim pitanjima poput: „Otkud baš ti medresu da upišeš?“ ili „Jesu li te tvoji natjerali?“ i slično.

Danas sa velikim osmijehom i ponosom na ta ista pitanja odgovaram te objašnjavam kako sam presretna i zahvalna Allahu jer se sve tako dogodilo. Molim Allaha da svakome ko prolazi kroz bilo kakvu dilemu, olakša i da mu ukaže na pravi izbor, amin.

Sabrina Vehab, Id



Čovjek je oduvijek bio komplikovan biće koje uvijek nešto planira i razmišlja o budućnosti. To planiranje i razmišljanje se pogotovo uključivalo u temu o srednjoj školi. Nešto što je mojim roditeljima pogotovo stvaralo topli obruc oko srca je što sam uvijek odlučno odgovarala: „Ja ču medresu, i to Gazi Husrev-begovu.“ I što se više bližio dan donošenja konačne odluke više sam opcija uzimala u obzir, ali ni jedna od tih opcija me nije dojmila na tako magičan način. Osim svih očiglednih činjenica, moja radoznalost i ambicija su me povukle u Sarajevske sokake, ravno do medrese. Svidjela mi se ideja izazova, da budem tamo gdje svi kažu da je najteže i gdje ne bi mogli da se uklope. Da s ponosom širim znanje koje sam stekla, gledajući u ponosne roditelje, prijatelje i profesore. Tu je i neki unutrašnji osjećaj koji se rasplamsa kad se spomene medresa u Sarajevu. Ta rasplamsalost mi je dala do znanja da bih se pokajala u bilo kojoj drugoj školi. Ta radost i čežnja.

I kući ostavila uplakanu ali ponosnu i sretnu porodicu, i uzimala sam ih kao dodatnu motivaciju, nakon što sam napokon dočekala zakoračiti u ovu školu. Nakon svega me čuvala ta porodična ljubav koju su mi pružili ostali učenici i učenice. Svi oni imaju tako blage riječi, vesele naravi, i objašnjenje za sve. S tim, medresa nije postala ništa manje od moje druge kuće, iz koje rado kažem da dolazim. I da vam kažem, poseban je osjećaj u Sarajevskom jutarnjem zraku, dok šetam sa novim kolegicama do škole. Osjećaš neki smiraj, nigdje drugo do u samoj duši. Negdje duboko u sebi, osjećaš tu harmoniju i zadovoljstvo, bez obzira koliko je teško.

Amina Kahrimanović I-b

Još kao djevojčica, dosta sam toga čula i znala o medresi. Tu malu djevojčicu su ponajviše očarale maturske haljine, sve se činilo kao bajka i jednostavno sam željela da budem jedna od medresanskih princeza. Odrastajući sam shvatila mnoge stvari i počela razmišljati drugačije. U životu se često dvoumimo, ali ja sam ovaj put bila odlučna i ostala pri istom razmišljanju. Odlučila sam da će baš ova, Gazi Husrev-begova medresa, biti moje svjetlo i put u životu, u budućnosti. Znam da medresa nije samo maturska haljina koja ostavlja bez daha, nego je mnogo više. Kako svi koji su prošli kroz medresu kažu: „Najljepši dio života“. Pitate se, kako sada već to znam? Reći ču vam da ono što osjećam i ono što je u mom srcu teško se može opisati riječima. Ovo se samo može doživjeti. Prvi pogled na najljepšu školu, prvi koraci u njoj su ono što ču pamtitи do kraja života. Možda se ona s polja čini kao i sve druge škole, međutim, unutrašnjost odiše ljubavlju, sigurnošću i srećom. Sve je to medresa.

Amina Pehlivanović, I-d

Srednja škola je prva prekretnica u našem životu, prvo preusmjerenje nas samih. Uglavnom, momci i djevojke biraju škole koje su usmjerene na njihova buduća zanimanja ili koja su u skladu sa njihovim sposobnostima. Postoje i oni koji ne znaju što žele biti pa im biranje srednje škole bude dodatno otežano. Odrasla sam u vjerskoj porodici. Čestim spominjanjem vjere u raznim aspektima života, redovnim pohađanjem mektebske nastave, moja ljubav prema islamu je rasla. Nastupanjem mjeseca juna, sigurnost u odluku je ojačala. Dileme nije bilo, srce je vuklo ka tome, postadoh i ja učenica Gazi Husrev-begove medrese. Grudi su mi se stezale, dah se kratio i jedan slatki uzdah sreće se iskrao. Tog dana sam shvatila što znači ostvariti dugogodišnju želju. Prvim korakom u medresu sam pomislila kako je baš to ono što želim, to je mjesto kojem pripadam. Ponosna sam na ovu divnu ustanovu, a potrudit će se da i ona bude ponosna na mene. Kada se spomene Gazi Husrev-begova medresa, svi učenici zaštute, ne zbog toga što nemaju što reći, već zbog toga što ne znaju odakle početi, koje epitete iskoristiti, hoće li biti dovoljno.

I sada, dok sjedim u haremu Begove džamije, gledam prolaznike, osmjeh se pojavljuje. Golub sa Sebilja zna priču o medresi, te je radosno i srdačno guguće turistima. Da se vratim u juni 2020. godine, bez imalo sumnje i sa većom radošću od prvog puta, ponovo bih birala Gazi Husrev-begovu medresu.

Emina Delić, Id

Kroz skoro čitavo osnovno školovanje tragoval sam za odgovorom na jedno pitanje. To pitanje je bilo koju srednju školu upisati. Nisam mogao doći do odgovora sve do devetog razreda, kada mi je pala na pamet srednja škola koju je moj stariji brat do tada pohađao već tri godine i iz nje pokupio samo pozitivna iskustva, a ta škola je bila Gazi Husrev-begova medresa. Tada sam počeo mnogo razmišljati o njoj i kroz bratove priče shvatio da je to prava škola za mene. Ta odluka se ispostavila kao najbolja odluka u mom životu. Gazi Husrev-begova medresa je škola u kojoj se može steći znanje o vjerskim naukama, kao i o prirodnim i društvenim naukama. Osim toga medresa je i odgojna ustanova koja od učenika pravi moralne i dobre ljudi. Iz tih razloga sam odlučio upisati ovu školu i očekujem da će iz nje izaći kao dobar čovjek koji će biti čvrsto na Allahovom, dž.š., putu.

Amar Mulaosmanović, 1b

Amfiteatar dobio novi izgled

Gazi Husrev-begova medresa je najvažnija odgojno-obrazovna institucija Rijaseta Islamske zajednice u Bosni i Hercegovini, a njen amfiteatar mjesto je zbivanja najvažnijih događaja u novijoj historiji Islamske zajednice, od svečanih akademija, naučnih skupova, sjednica Sabora Islamske zajednice pa sve do izbora reisul-uleme.

Amfiteatar Gazi Husrev-begove medrese je prvi put otvoren 29. septembra 1977. godine u cilju organizacije svečanosti otvorenja Fakulteta islamskih nauka u Sarajevu, te do danas nije imao većih rekonstrukcijskih zahvata.

Obnova amfiteatra trajala je od 1. jula do 29. septembra ove godine, a preduzeće **Zarka** je projektovalo i nadziralo ovaj projekat, kao i prethodne koji su rađeni u Medresi u protekle četiri godine. Važnu ulogu u obnovi, pored uprave Medrese, odigrali su donatori Udruženje za blagostanje **Rahma International Society** iz Kuvajta.

Obnovljeni amfiteatar ima 181 sjedeće mjesto na površini od 200m². Urađena je kompletanu rekonstrukciju elektroinstalacija, te je ugrađen pametan sistem koji podrazumjeva upravljanje funkcijama s jedne tačke.



Amfiteatar prije rekonstrukcije

Amfiteatar je svečano otvorio reisul-ulema Hussein ef. Kavazović, 7. oktobra 2020. godine, a pored njega svečanosti su prisustvovali predsjednik Sabora Islamke zajednice u BiH Safet Softić, zamjenik reisul-uleme prof. dr. Enes Ljevaković, direktori uprava organizacionih jedinica i ustanova Islamske zajednice, te predstavnici donatora, projektanta, nadzora i izvođača radova.



Govor Reisu-l-uleme na ceremoniji otvaranja

Svečani program je počeo odlomcima iz Kur'ana koje je proučio hfv. Omer-ef. Zulić, profesor kiraeta, a rječi dobrodošlice uputio je direktor Medrese hfv. dr. Mensur-ef. Malkić. Direktor je naglasio povod otvaranja amfiteatra, a prisutni su mogli pogledati kratkometražni film rahmetli Nijaza Šukrića iz tih dana, te nekoliko fotografija otvorenja prije 43 godine.

U nastavku svog obraćanja, direktor Malkić je upoznao prisutne da je Gazi Husrev-begova medresa u okviru petogodišnjeg plana rekonstrukcije i adaptacije zgrade, nakon kompletne obnovljenih prostorija internata, učionica, kabineta, restorana i dvorišta, ove godine uspješno realizirala projekat rekonstrukcije amfiteatra. Ukupna vrijednost ugovorenih radova

iznosi 339.457,74 KM, od čega je 230.000 KM obezbijedilo Udruženje za blagostanje - **Rahma International Society** posredstvom Vakufske direkcije Rijaseta Islamske zajednice, a ostatak u iznosu od 109.457,74 KM obezbijeden je iz Budžeta Gazi Husrev-begove medrese u Budžetu Rijaseta.

Također, direktor Malkić je iskoristio priliku i zahvalio se svima koji su podržali realizaciju ovog i spomenutih projekata, prije svih, njezinom osnivaču – Rijasetu Islamske zajednice i uvaženom reisul-ulemi dr. Husein-ef. Kavazoviću, te Upravi za obrazovanje i nauku, kao i Upravi za ekonomski i finansijske poslove. Posebno se zahvalio Udruženju za blagostanje Sarajevo - **Rahma International Society** i direktoru Aymanu El-Fak'awy, i donatorima iz države Kuvajt, koji su najvećim dijelom finansirali projekat, kao i Vakufske direkcije i direktoru dr. Senaidu Zajimoviću. Zahvalio se i uposlenicima firme „Zarka“ iz Sarajeva i njenom direktoru Zijadu Imamoviću koji su uradili predračun radova, projektovali i nadzirali rekonstrukciju amfiteatra, a posebno arhitektici Ubejdi Imamović-Hodžić, koja je dala posebnu notu ovom lijepom amfiteatru, ali i ostalim spomenutim projektima. Riječi zahvale uputio je i izvođačima radova, firmi „Džena“ d.o.o. iz Gradačca i njenom direktoru Hasanu Topčagiću, koji su izvodili građevinsko-zanatske i mašinske radove, te firmi „Klaus Lehmann“ d.o.o. iz Gračanice i direktoru Abdulahu Fažliću, koji su izvodili elektroinstalaterske radove.



Radovi na rekonstrukciji



Obnovljeni amfiteatar

Reisul-ulema, dr. Husein-ef. Kavazović, je u svom obraćanju čestitao direktoru Malkiću i članovima menadžmenta koji su svojim predanim radom najzaslužniji za realizirane projekte. **Gazi Husrev-begova medresa je naša najvažnija obrazovna ustanova koja već skoro pet stoljeća odgaja i obrazuje mlade ljude koji, kao njezini svršenici, u domovini i širom svijeta rade za dobrobit naše zajednice i naroda**, kazao je reisul-ulema. Također, zahvalio se donatorima iz Kuvajta i direktoru Udruženja za blagostanje, gospodinu Aymanu El-Fak'awy na podršci ovom projektu.

Dovom Allahu, dž.š., da iz ove ustanove, kao i do sada, uvijek izlazi dobro, reisul-ulema je proglašio obnovljeni amfiteatar svečano otvorenim., a na kraju programa dovu je proučio zamjenik reisul-uleme, prof. dr. Enes Ljevaković.

Ovom prilikom, reisul-ulema je, u pratnji direktora Medrese dr. hfv. Mensura Malkića, upravnika mr. Dževada Pleha i pedagogice Sabahete Ahmetagić, posjetio dva odjeljenja prvog razreda, te čestitao učenicima i učenicama prvog razreda upis i početak školovanja u najstarijoj i za Bošnjake najznačajnijoj obrazovnoj ustanovi čiji svršenici stoljećima hizmete i vode ovaj narod kroz sva njihova iskušenja. Izrazio je nadu da će i oni svojim radom i zalaganjem ispuniti očekivanja Islamske zajednice i svojih roditelja da budu vrijedni, uspješni i pošteni, da će nastaviti da štite i promiču vrijednosti svoje vjere i svoga naroda uključi prije svega u svoje obrazovanje, da postignu zvanja magistara i doktora nauka.

Nova online školska godina

Novonastala situacija uzrokovana virusom "Covid 19" uzrokovala je razne nepovoljne stvari koje su uključivale promjenu načina pohađanja nastave u srednjim školama. Tako su učenici srednjih škola Kantona Sarajevo, svoju školsku 2019./2020. godinu završili putem onkine modela pohađanja nastave. Čekajući početak nove školske godine učenici su se nadali kako će istu započeti u školskim klupama, uz škripu stolica, graju i poželjeni glas školskog zvona. Ipak, nova školska 2020./2021. Godina započela je putem online platforme. U skladu sa novonastalom situacijom Ministarstvo za obrazovanje, nauku i mlade KS donijelo je mjere i uputstva o načinu obrazovanja i realizovanja nastave kako u osnovnim tako i u srednjim školama.

Tako je bilo sve do 14.9. 2020. godine kada se Odlukom Ministarstva prešlo na kombinovani model pohađanja nastave. Od 14.9. do 09.10.2020. godine za učenike 1. i 4. razreda Gazi Husrev-begove medrese realizirao se kombinovani model nastave po smjenama/grupama. Učenici su bili raspoređeni u dvije smjene/grupe. Dvije sedmice (14. do 25. septembra) jedna polovina učenika 1. i 4. razreda (prva grupa) pohađala je nastavu u Školi, a druga polovina učenika 1. i 4. razreda

(druga grupa) pratila je nastavu putem online platforme. Naredne dvije sedmice (od 28.9. do 09.10.2020. godine) druga polovina učenika 1. i 4. razreda (druga grupa) pohađala je nastavu u Školi, a prva polovina učenika 1. i 4. razreda (prva grupa) pratila je nastavu putem online platforme.

- INTERVJU, kao i anketa, koristi pitanja da bi se došlo do odgovora o predmetu istraživanja, ali usmeno, u razgovoru sa ispitanikom.
- Intervju je pogodno sredstvo za manje grupe ispitanika, jer su odgovori na pitanja duži i sastoje se iz više rečenica.
- U sociološkim istraživanjima obično se koriste dva osnovna tipa intervjuja: standardizovani i slobodni.
- Standardizovani intervju sadrži unaprijed utvrđena pitanja, i voditelj intervjuja ih svakom ispitaniku postavlja istim redom i u istom obliku.
- Slobodni intervju nema unaprijed pripremljenih pitanja, voditelj ih postavlja slobodno na licu mesta.

Intervju je pogodan za nepismene ispitanike.

Nakon toga, u skladu sa Odlukama nadležnog ministarstva, u kombinovani model nastave po istom principu trebali su biti uključeni učenici 2. i 3. razreda. To se i desilo te su svi učenici bili uključeni u ovaj model od 12.10.2020. Godine. Međutim, u skladu sa Naredbom Kriznog štaba Ministarstva zdravstva Kantona Sarajevo od 21.10.2020. godine, zbog značajnog povećanja broja zaraženih koronavirusom u Kantonu Sarajevo, od petka, 23.10.2020. godine, u svim srednjim školama Kantona Sarajevo realizira isključivo online nastava.

Sve ovo je za nas veliki izazov, ali uz želju, volju, trud i rad učenika, i bezrezervnu pomoć profesora i Uprave Gazi Husrev-begove medrese, nastava se odvija na najbolji mogući način. Nadamo se, uz Božiju pomoć, da će se situacija polahko popravljati kako bi se i mi mogli vratiti u našu Medresu.

Naravno sam princip rada zasnovan na online platformi donosi razne komplikacije i tehničke probleme, ali zahvaljujući razumijevanju profesora koji nastoje tolerisati sve poteškoće sa kojima se susrećemo.

Profesori vrlo dobro pristupaju radu sa učenicima te se trude olakšati i pojednostaviti gradivo što je više moguće.



Šaljivi kutak

Zašto se u riječi "bekrije" vidi slovo e ako ga b krije?

Matematičar: tužan sam

Prijatelj: nemoj biti, budi pozitivan

Matematičar: |tužan sam|

U ovo doba korone socijalni život u Švedskoj je Sweden na minimum.

Zapalila se veš mašina, u vazduhu se osjećao miris Gorenja.

Koji ugao je najružniji?

Pravougly

Kako bi zvali Danila Kiša da je bio jači?
Danilo Pljusak

Zašto Beethoven ima kovrdžavu kosu? Zato što je u Vienna.

Zvao Faradej Mendeljejeva telefonom i pita ga: "Da nemaš slučajno Avogadrov broj?"

Kako se zove aplikacija koja ne može da prepozna pjesmu? Š'a znam!

Zeko: medo, kad da svratim do tebe?
Medo: ajde bunny oko 6

Kako se zove kobasica koja je stigla iz kine?
Čajna kobasica

Kako se zove antilopa na dijeti?
Antiklopa

Šta kaže akuzativ lokativu dok slušaju muziku?
Uuuu brate kakav instrumental

Šta radi Skubi na glavi?
Dooby

Kako se zove lama koja viče?
Galama

Kako se zove Petar Pan kojem se prispavalo?
Pos Pan

Doktor: imate manjak magnezijuma
Pacijent: oMg

Kako zovu kolegu na građevini koji teško pamti lica?
Mješa lica

Progutao sam flomaster.
Ti nisi normalan. Jesi li rekao babi?
Nisam, bojim se

Fanta: sinoć sam sanjao da sam bez šećera
Kola: jesи то malo fanta zero?

Kako se zove pauk koji živi u potrovlju?
Tavantula

Kako se zove pametna ajkula?
IQla

Igraju dva eksera košarku i dođe čekić i zakuka
Idu dva točka i valjaju se od smijeha

Prešao Dok Holidej na islam, sad se zove Hećim Bajram

Kako je oslobođena francuska humanitarka postala muslimanka

Islam je vjera koja se prakticira u svakom trenutku. Mi smo muslimani i u džamiji, i u školi, i u bolnici, i na ulici, i na svakom drugom mjestu, jer je islam način života. Svakodnevno se klanjamо svome Gospodaru, spominjemo Ga i zahvaljujemo Mu. Upravo ta predanost islamu je učinila da su nam naš Gospodar, naš Poslanik s.a.w.s., i naša vjera važniji i od nas samih. To će teško razumjeti oni koji svoju vjeru prakticiraju jednom sedmično, mjesečno ili jednom godišnje, a posebno će teško razumjeti oni kojima su božanstvo strasti i prohtjevi.

Željeli mi to ili ne, drugi vide islam onakvim kakvим smo mi. Ali, to nije prava slika islama, jer je islam toliko lijep da i najljepše ponašanje čovjeka daje tek jedan djelić te ljepote. Mi moramo biti drugima primjer čestitosti, dobrote, plemenitosti, oprاشtanja i pomirenja, primjer najljepšeg ponašanja jer svemu tome nas uči naša uzvišena vjera islam

Povratak kući Francuskinje Sofie Petronin, humanitarne radnice, koja je skoro četiri godine bila u zatočeništvu u Maliju, što je francuska javnost, naravno, odmah iskoristila kao napad na islam, zaintrigirao je javnost, a posebno muslimane. Razlog tome jeste to što je ona uprkos četverogodišnjem zatočeništvu od strane muslimana, odlučila prihvati našu vjeru i to u 75.-oj godini života, te kako je predila sebi ime u Merjem.

Sofia, Merjem nije otišla u Mali s lošom namjerom, već s plemenitom nakanom da pomogne djeci koja boluju od malarije i neuhranjenosti. Ali, u Maliju je dočekana kao simbol francuskog kolonijalizma. Kao osoba s humanističkim srcem, Merjem je nedužno kidnapovana od muslimana u Maliju, koji su bili isfrustrirani zbog miješanja stranaca u njihov svakodnevni život. Merjem je nedužno patila, ali je na kraju shvatila da je cijela ta priča oko islama i muslimana u Europi besmislena i sa starim nepopravljivim predrasudama. Shvatila je da se tu ne radi ni o kakvom „islamskom terorizmu“, već o klasičnom

europeiskom ekspanzionizmu, koji ima vojnu silu, ali nema duhovnu mjeru za ljudе i narode u Aziji, Africi i na Bliskom istoku, koji nikome zlo ne misle, nikoga ne ugrožavaju, već se bore kako znaju i umiju da prežive.

Merjem je rekla kako se vratila u Francusku samo kako bi svoju porodicu i najmilije pozvala u islam, žečeći im dobrotu ovoga i budućeg svijeta.

Iako je prije Sofie bilo prelazaka na islam, njen slučaj izazvao je veliku medijsku pažnju zato što se u priču umiješao francuski predsjednik Emmanuel Macron, koji se u zadnje vrijeme nije proslavio s izjavama o islamu i muslimanima. Macron je bio potpuno iznenaden i razočaran kad mu je Sofia rekla da je postala muslimanka i da pred njim, umjesto Sofie Petronin, stoji Merjem.

Muslimani su ogledalo islama, ljudi kroz nas vide islam i shvataju ga onakvim kakvim ga mi predstavljamo, tj. kako se mi svakodnevno ponašamo.

U Kur'etu je rečeno: "U vjeri nema prisile". Niko ne smije silom tjerati drugog da bude musliman, ali zato svojim ponašanjem, svojim lijepim ophođenjem prema drugima može osvojiti ljudska srca i učiniti da oni sami, bez prisile, prihvate i zavole islam.





Ambasadori islama

Muslimani danas prolaze kroz ne baš lahka vremena. Postoje mnogi primjeri država koje, slobodno možemo reći, šire islamofobiju te na razne načine otežavaju život muslimanima. Pored toga što se trebamo sjećati muslimana i muslimanki koji prolaze kroz razna iskušenja širom svijeta u našim dovama, na nama je da našim djelima pokažemo šta je to islam, umjesto da o tome samo govorimo. Djelima ćemo najbolje pokazati ljestvu dini islama, tj. kako živjeti ovaj jedan život koji imamo na ovome svijetu na ispravan, ujedno i najljepši način. U ovoj rubrici donosimo biografije muslimana koji su pokazali da je islam sastavni dio njihovog uspjeha. Uspješno žive islam pod



lupom miliona njihovih pratitelja, te nam daju odličan primjer, posebno mlađim naraštajima. U ovom broju govorimo o Khabibu Nurmagomedovu, ruskom MMA borcu.


Nurmagomedov je rođen 20. septembra 1988. godine u Sovjetskom Savezu, u selu Silde u današnjem Dagestanu, u Rusiji. Još u djetinjstvu je počeo da se bavi hrvanjem pod uticajem oca. Njegov otac je imao crni pojас u džudou i takođe je bio prvak Ukrajine u sambu.

Nakon srednje škole, upisao je studije ekonomije na Državnom univerzitetu Ministarstva finansija u Mahačkali. Za njega često kažu da je jedan od

najboljih boraca koji su se bavili MMA-om. Prvak je svoje kategorije od aprila 2018., sa rekordnim rezultatom od 29 pobjeda i 0 poraza, što je ujedno i najduži niz pobjeda. Prvi je musliman koji je postao prvak MMA-a. Ubrzo nakon što je otišao u mirovinu, mnogi su ga proglašili #1 na raznim ljestvicama svoje kategorije.

Nakon ostvarivanja ovakvih rezultata, Khabib je postao svjetski popularan, što pokazuju i njegove društvene mreže na kojima ima desetine miliona pratitelja. Značajno je spomenuti da slava Khabiba nije promijenila. U Khabibu imamo divan primjer muslimana koji je izuzetno kompetentan u svojoj struci, što mu je donijelo slavu koja ga nije promijenila. Svojim djelima iz dana u dan pokazuje kako život živjeti na najbolji način, odnosno kako živjeti islam, a ujedno biti uspješan i u dunjalučkim poslovima. Raznim postupcima je pokazao svoju smirenost, sabur i odgoj čime je osvojio mnoge ljude širom svijeta.

Potrebnije je živjeti islam te djelima pokazati ljestvu ove vjere, nego samo govoriti o tome. Zadajmo sebi velike zadatke, ciljeve, budimo ambiciozni, baš kao što nam Khabibov primjer pokazuje. Zapamtimo, sve je moguće uz Svemogućeg.



ČUVARI BOŽIJE KNJIGE

U prethodnom periodu veliki broj kako učenika i učenica, tako i svršenika medrese položilo je hifz. U ovome tekstu, kako je i do sada bio običaj, donosimo informacije o njima te im čestitamo riječima Allah mubarek olsun.

Mi, uistinu, Kur'an objavljujemo i zaista ćemo Mi nad njim bdjeti. (El-Hidžr, 9.)

HATIDŽA ČENGIĆ, kćerka Faruka i Nalvedine, rođena je 07. oktobra 2001. godine u Sarajevu. Gazi Husrev-begovu medresu završila je kao učenica generacije. Hifz je učila pred svojim profesorom kiraeta, hafizom Omerom Zulićem. Polaganje hifza je trajalo od 02. do 16. marta 2020. godine pred hafiskom komisijom: hadži-hafiz Ismet-ef. Spahić, predsjednik; dr. hafiz Mensur-ef. Malkić, član, hadži-hafiz Haso-ef. Popara, član, i hafiz mr. Salih-ef. Halilović, član. Trenutno je studentica prve godine Medicinskog fakulteta u Sarajevu.

DR. RIFET ŠAHINOVIC, rođen je 20. juna 1972. godine u Varoškoj Rijeci, Bosanska Krupa. Gazi Husrev-begovu medresu završio je školske 1990/91. godine. Hifz je učio pred muhaffizom hafz. dr. Mensurom Malkićem, direktorom Gazi Husrev-begove medrese, a polagao pred Komisijom Rijaseta Islamske zajednice u Bosni i Hercegovini u sastavu: hafz. Ismet-ef. Spahić, hafz. dr. Mensur-ef. Malkić, hafz. Haso-ef. Popara i hafz. mr. Salih-ef. Halilović, u periodu od 09. do 23. marta 2020. godine.



VEDAD ČOLAKOVIĆ, sin je Kasima i Nihade iz Vogošće. Rođen je 13. decembra 2000. godine u Sarajevu. Završio je Gazi Husrev-begovu medresu kao učenik generacije. Istakao se i kao vrstan matematičar i fizičar. Muhamfiz mu je bio hafz. Omer Zulić. Polaganje hifza trajalo je od 02. do 16. jula 2020. godine pred hafiskom komisijom: hafiz Ismet-ef. Spahić, predsjednik; dr. hafiz Mensur-ef. Malkić, član, hafiz Haso-ef. Popara, član, i hafz. mr. Salih-ef. Halilović, član. Trenutno je student prve godine Elektrotehničkog fakulteta u Sarajevu, smjer Automatika i elektronika.

SUADA HUSIČIĆ-NOVALIĆ, kćerka Muhameda i Hatidže, rođena je 21. januara 1986. godine u Željeznom Polju, Žepče. Hifz je počela učiti još za vrijeme medresanskih dana, ali je pauzirala zbog školskih, kasnije i porodičnih obaveza. Diplomirala je na Filozofskom fakultetu u Sarajevu, odsjek za historiju, te sada radi kao nastavnica u osnovnoj školi. Hifz je učila pred hafizom Medinom Živčić-Moco. Uspješno je proučila cijeli Kur'an za deset dana, učeći dnevno po tri džuzu, pred Komisijom Rijaseta IZ-e u BiH, u sastavu: hafiz Ismet-ef. Spahić, predsjednik; dr. hafiz Mensur-ef. Malkić, član; hafiz Haso-ef. Popara, član; i mr. hafiz Salih-ef. Halilović, član.



ADNAN SALIHAGIĆ, sin Edina i Salihe, rođen je 07. avgusta 2002. godine u Sarajevu. Trenutno je učenik četvrtog razreda Gazi Husrev-begove medrese. Prethodna tri razreda završio je uspješno, s prosjekom 5,00. Hifz je učio pred mr. hafz. Ammarom Bašićem. Polaganje hifza je trajalo od 06. do 20. avgusta 2020. godine pred hafiskom komisijom: kurra hafiz dr. Dževad Šošić, hafz. dr. Muhamed Čajlaković, hafz. dr. Đevad Hrvačić i hafz. mr. Abdulaziz Drkić.



MUHAMED ALETIĆ rođen je 18. jula 2000. godine u Travniku. Potiče iz hafiske porodice, od oca hafiza Salema i majke Amele. Sestra mu je također hafiza, kao i supruga Velida, inače učenica generacije Gazi Husrev-begove medrese u školskoj 2017/18. godini. Hifz je učio pred svojim profesorom kiraeta, hafizom Omerom Zulićem. Polaganje hifza je trajalo od 08. do 22. avgusta 2020. godine pred hafiskom komisijom: hafiz Ismet-ef. Spahić, predsjednik; dr. hafiz Mensur-ef. Malkić, član; hafiz Haso-ef. Popara, član, i hfv. mr. Salih-ef. Halilović, član. Trenutno je student treće godine Fakulteta islamskih nauka u Sarajevu.



EMINA TABAKOVIĆ, kćerka je Hamzalije i Sadije iz Ilijaša. Rođena je u Sarajevu 01. januara 2001. godine. Osnovnu školu završila je u Ilijašu, a ove godine i Gazi Husrev-begovu medresu sa prosjekom 5,00. Također, bila je kandidatkinja za učenicu generacije. Hifz je učila pred svojim bratom, hafizom Abdurahmanom. Polaganje hifza je trajalo od 14. do 27. avgusta 2020. godine pred hafiskom komisijom: hafiz Ismet-ef. Spahić, predsjednik; dr. hafiz Mensur-ef. Malkić, član, hafiz Haso-ef. Popara, član, i hfv. mr. Salih-ef. Halilović, član. Trenutno je studentica prve godine IUS-a, odsjek Psihologija.



HALID JUSIĆ, sin Edhema i Alije, rođen je u Travniku 27. oktobra 2000. godine. Osnovnu školu završio je u Gračanici kod Visokog, a zatim Gazi Husrev-begovu medresu sa odličnim uspjehom. Hifz je učio pred mr. hfv. Ammarom Bašićem. Polaganje hifza je trajalo od 02. do 16. septembra 2020. pred hafiskom komisijom: dr. kurra hfv Dževad Šošić, dr. hfv. Dževad Hrvacić, dr. hfv. Muhamed Čajlaković i mr. hfv. Abdulaziz Drkić. Trenutno je student prve godine Fakulteta islamskih nauka u Sarajevu. Porodica Jusić počašćena je sa još jednim hafizom, svršenikom Gazi Husrev-begove medrese, Abdulvahidom Jusićem.



ISMAIL ŠKOBALJ, sin Samira i Fethije, rođen je u Sarajevu 14. februara 1999. godine. Gazi Husrev-begovu medresu završio je kao odličan učenik. Hifz je učio pred svojim profesorom dr. hfv. Đevadom Hrvacićem. Polaganje hifza je trajalo od 07. do 21. oktobra 2020. godine pred hafiskom komisijom: hafiz Ismet-ef. Spahić, predsjednik; dr. hafiz Mensur-ef. Malkić, član, hafiz Haso-ef. Popara, član, i hfv. mr. Salih-ef. Halilović, član. Trenutno je student druge godine na Islamskom univerzitetu u Medini.



ABDURAHMAN HADŽIĆ, sin je Selmira i Edine iz Doboj Istoka. Rođen je 11. decembra 2000. godine u Medini. Završio je osnovnu školu u Brijesnici Velikoj, a zatim Gazi Husrev-begovu medresu u Sarajevu sa odličnim uspjehom. Hifz je učio pred prof. hfv. Omerom Zulićem. Polaganje hifza trajalo je od 02. do 16. novembra 2020. godine pred hafiskom komisijom u sastavu: kurra hafiz dr. Dževad ef. Šošić, predsjednik; hafiz dr. Đevad ef. Hrvacić, član; hafiz dr. Muhamed ef. Čajlaković, član i hafiz mr. Abdul-Aziz ef. Drkić, član. Trenutno je student prve godine Fakulteta islamskih nauka u Sarajevu, smjer Islamska teologija.



Koristimo priliku čestitati svim hafizima i hafizama, njihovim porodicama i muhaffizima, uz dovu Uzvišenom da ih učini od istinskih čuvara Njegovog plemenitog Govora, a nama da podari bereketa u vremenu, očisti namjere i učvrsti naše korake na putu Njegova zadovoljstva. **Amin!**



Proces kod biljaka	Tehnika slikanja tackama		Fashion	Biohemija	Nedostatak apetita (BOLEST)	Početnik (GEN) Nos, usta, pluća			
	...mjesec						Selena Zemlje Afrike		
						Peleponez			
						Amercijum	Nisam (potvrđno) 1.slovo abecede	Web	Pridjev
	Brend				Vreo izvor				
							Yes or ...		
	...medvjed				Sustav		Throw-back		
	Bez obuće (mr)			Vrećica sinonim	Jediničica za površinu		Evropska Unija		
	moral				Oko (gen)	Metar Volt	Republika Srpska		
			Eng. Filozof (čiji)					Niton KU	
	Zaljev u Španiji				Kelvin		Robna kuća		
	Član u eng. jeziku		Also know as			Jedinica za silu			

NA SAMRTI

Na ahiret je preselio poznati kuvajtski pisac Abdullah el-Džarullah, rahimehullah, koji je prije nekoliko vremena, na jako lijep način, opisao stanje čovjeka na samrti.

Slijedi prevod tog njegovog opisa...

Kad budem na samrti neću se žalostiti...

I neću brinuti za svoje prolazno tijelo,
Moja braća muslimani će izvršiti obaveze prema meni, a to su:

- 1- da će mi skinuti odjeću,
- 2- ogasuliti me,
- 3- u čefine me zamotati,
- 4- iznijeti me iz kuće,
- 5- odnijet će me do mog novog prebivališta - kabur,
- 6- doći će mnogi da isprate moju dženazu, čak će neki odgoditi i svoje poslove kako bi došli da me ukopaju...

Iako većina njih nije razmišljala o savjetu kojeg sam im uputio jednoga dana...

7- mojih ličnih stvari će se lahko otarasiti...

- mojih ključeva,
- mojih knjiga,
- moje torbe,
- obuće,
- odjeće, i drugih stvari...

a ako moja porodica bude prihvatile, možda će se nekome to i pokloniti, pa ja budem od toga imao koristi...

Budite sigurni da dunjaluk neće tugovati zamonom...

da svijet neće stati zbog moje smrti,
a ekonomija će i dalje ići svojim tokom,
I moj posao... doći će neko drugi da ga preuzme,
Moj imetak će otići, halalom, mojim nasljednicima,
dok će ja za njega odgovorati!!!
I za malo i za veliko...

I prvo bez čega će ostati, nakon smrti, jeste moje ime!!!

Zbog toga će, kada umrem, govoriti: "gdje je to tijelo"?

I niko me više neće zvati po imenu!

Kada mi budu htjeli klanjati, reći će: "donesite tu dženazu".

I neće me zvati po imenu!

I kada me budu htjeli staviti u mezar, reći će: "pri-maknite tog mejta", i neće spomenuti moje ime...

Zbog toga mi toga dana neće biti od pomoći, moje porijeklo, niti moje pleme, neće mi pomoći moja pozicija, niti to što sam bio poznat...

I zato ti koji si sada živ, dobro znaj, da će se za tobom žaliti samo na tri načina:

1- Ljudi koji te samo onako poznaju, iz viđenja, reći će: "šteta"...

2- Prijatelji i drugari, biće žalosni nekoliko sati, ili par dana, i nakon toga će se vratiti svojoj priči, čak će se i smijati, kao da ništa nije ni bilo.

3- Velika žalost će biti u kući. Porodica će žaliti za tobom sedmicu... dvije... mjesec... dva mjeseca, možda čak i godinu... ali nakon toga će te staviti u arhivu sjećanja.

Ispričana je tvoja priča kod ljudi, na dunjaluku, a počinje tvoja stvarna priča, koja se zove: Ahiret!

Nestalo je:

- 1- ljepote,
- 2- imetka,
- 3- zdravlja,
- 4- djece,
- 5- napustio su kuće i divorce,
- 6- supružnika,

...nije ti ništa ostalo, osim tvojih dobrih djela, a počeo je za tebe stvarni život!

Ovdje se postavlja pitanje:

Šta si ti pripremio/la za tvoj kabur, za tvoj ahiret???

Ovo je realnost koja, zaista, zaslужuje da kod nje zastanemo i da o njoj duboko razmislimo!

Zbog toga, dobro pazi na sljedeće stvari:

- 1- na farzove (namaz, post, zekat...),
- 2- na dobrovoljne ibadete (nafile),
- 3- skrivena sadaka,
- 4- dobro djelo - ma kakvo bilo,
- 5- namaz u noći – dok drugi spavaju.

Da bi se spasio...

Ako budeš pomogao da se proširi ova opomena, a ti si sada živ, naći ćeš to na vagi svojih dobrih djela, na Sudnjeme danu, inšallah...

"I opominji, pa uistinu će opomena koristiti vjer-nicima."



Fotografija: Edin Imamović
Zemzem 2020 ©